


(d) 17/95

m

£ 35-



ROYAL COLLEGE OF PHYSICIANS

WITHDRAWN FROM LIBRARY

Sabin.


Not in Cundall




John Carter Brown
Library
Brown University

JOHN CARTER BROWN
LIBRARY

Purchased from the
Trust Fund of
Lathrop Colgate Harper
LITT. D.






RELATION
DE L'ESTABLISSEMENT
DES FRANCOIS
DEPVIS L'AN 1635

En l'isle de la Martinique, l'une des
antilles de l'Amerique.

*Des mœurs des Sauvages, de la situation
& des autres singularitez de l'isle.*

Par le P. JACQUES BOVTON, de la
Compagnie de IESVS.



A PARIS,
Chez SEBASTIEN CRAMOISY
Imprimeur ordinaire du Roy, rue
S. Jacques, aux Cicognes.

M. DC. XL.

Avec Privilege du Roy

RELATION

DE LA TANT

DE LA

DE LA

DE LA

DE LA

DE LA

DE LA

DE LA

DE LA

DE LA

DE LA

DE LA

DE LA



A MESSIEURS
DE LA COMPAGNIE
des isles de l'Amerique.



ESSIEURS,

Depuis le temps
que ie fis dessein, à la
gloire de Dieu, de
vous servir aux fonctions de
ma profession dans l'une de vos
isles de l'Amerique, i'ay creu
vous estre tellement acquis, que
ie ne deurois rien desirer, &
procurer plus ardemment, que
vostre contentement & satis-
faction en l'assistance que ie ren-
drois à vos subjets pour leur sa-
lut. C'est à cette fin que i'ay rap-
porté ce peu que i'ay tâché de

faire par delà durant quelques
mois; C'est à ce dessein que i'ay
repasé les mers; que ie suis icy;
Et que i'ay pris resolution de
donner au public ce petit narré
sous vostre nom. Je ne le puis
presenter à d'autres sans préju-
dicier à vos droicts; Et comme
il est tout à vous, j'espere aussi
qu'il recevra de vous un accueil
favorable. On cognoistra bien à
son langage qu'il vient du pays
des Sauvages, puis qu'il ne parle
pas beaucoup mieux françois
qu'eux; mais neantmoins, tel
qu'il est, il pretend paroistre pour
vostre service; desabusant ceux
qui ne peuvent croire qu'il y ait
maintenant tant de bien en cette
isle, que vos soins Et vostre pieté
y en ont procure. Et tant d'esper-

rance qu'il croisse à l'aduenir au
point qu'il croistra, Dieu ay-
dant, par les mesmes moyens qui
luy ont donné commencement.
S'il fait voir ces veritez aux
ignorans, il croira auoir fait
quelque chose pour vostre serui-
ce; puis qu'il vous est important
qu'on sache que vous auez tant
fait par le passé, & voulez tant
faire par cy apres en ces pays,
que ceux qui les decrient pour
n'y auoir pas trouué leur compte,
ne les blâment pas si iustement,
qu'on peut & doit blâmer leurs
fautes & maluersations, veri-
tables causes du desordre où ils
se trouuent. Il vous est aussi im-
portant que les autres qui y ven-
lent aller, apprennent qu'ils peu-
uent avec raison se promettre ce

qu'ils peuvent legitimelement de-
sirer pour leur profit & spirituel
& temporel. Que si i'ay marqué
quelques defauts & necessitez,
comme les choses de ce monde
n'ont pas toute leur perfection
dans leur commencement, c'est
pour faire voir combien vous
acquererez d'obligations sur les
habitans de ces isles, continuant
d'employer tant de soins, & fai-
re tant de despenſe pour les met-
tre à leur aise: Et que pour moy,
puis que ie prends, comme ie dois,
tant de part à leurs intereſts, ie
demeureray auſſi obligé de vous
eſtre toute ma vie,

MESSIEURS,

Tres-humble, & obeissant ſeruiteur,
IACQUES BOYTON, de la
Compagnie de Iesus.

Pe mission du R. P. Prouincial.

IE IACQUES DINET Prouincial
de la Compagnie de IESVS en la
Prouince de France: Suiuant le priui-
lege qui nous a esté octroyé par les
Roys Tres-Chrestiens Henry III. le
10. May 1583. Henry IV. le 10. De-
cembre 1605. & Louys XIII. à pre-
sent regnant, le 14. Feurier 1612. par
lequel il est defendu à tous Libraires
d'imprimer aucun liure de ceux qui sont
composez par quelqu'un de nostredite
Compagnie sans permission des Supe-
rieurs d'icelle, Permits à SEBASTIEN
CRAMOISY Marchand Libraire &
Imprimeur ordinaire du Roy en la vil-
le de Paris, de pouuoir imprimer pour
dix ans *la Relation de l'establissement des
François depuis l'an 1635. en l'isle de la
Martinique*, qui m'a esté enuoyée par le
R. P. BOYTON, de nostre mesme
Compagnie. En Foy dequoy i'ay signé
la presente. A Tours ce 6. iour d'Octo-
bre 1640.

IACQUES DINET.



TABLE DES CHAPITRES

contenus en ce liure.

N ostre embarquement, & les dangers que nous courûmes sur mer. Chap. I.	page 1.
De la situation de l'isle de la Martinique. Chap. II.	27
Entrée & establissement des François en cette isle. Chap. III.	34
Des commoditez que l'isle peut fournir. Chap. IV.	43
Continuation du mesme sujet, des commoditez de l'isle. Chap. V.	58
Des choses de cette isle qu'on peut transporter ailleurs. Chap. VI.	80
Incommoditez de l'isle. Chap. VII.	88
Des François qui habitent l'isle, & des Negres esclaves. Chap. VIII.	95
Des Sauvages du pays nommez Caraïbes. Chap. IX.	105
Continuation du mesme sujet des Sauvages. Chap. X.	120
Du fruit spirituel qu'on peut esperer de cette isle. Chap. XI.	130

RELA-



RELATION

DE L'ESTABLISSEMENT
DES FRANCOIS

depuis l'an 1635.

EN L'ISLE DE LA MARTINIQUE;
l'une des Antilles de l'Amerique.

*Des meurs des Sauvages ; de la situa-
tion, & des autres singularitez
de l'Isle.*

*Nostre embarquement, & les dangers que
nous courûmes sur mer.*

CHAPITRE PREMIER.

NOUS partîmes de Nan-
tes le Vendredy vingt-
cinqüiême de Nouembre,
iour de sainte Catherine, &

arriuâmes le lendemain à la rade de Paimbœuf, où estoit le vaisseau nommé la petite Europe, appartenant à monsieur Des-Martins de Paris. De Paimbœuf nous allâmes le Lundy à Saint Nazere, d'où nous fîmes voile le lendemain avec bon vent, mais foible, & qui dura si peu, que le contraire nous obligea de relâcher à l'Isle de Ré dès le leudy. Apres nous, y relâcherent vingt-cinq ou trente vaisseaux Anglois, Hollandois, Hambourquois, & autres, qui croyant que nostre vaisseau fust vn nauiere du Roy, mirent le pauillon bas. La nuit s'éleua vne furieuse tempeste, qui fut cause que plusieurs nauires, qui estoient à l'ancre, dériuerent & chasserent vers la

terre, le nostre perdit son maistre
anchre, & personne n'osa entre-
prendre ny le Vendredy, ny le
Samedy, de nous passer à la Ro-
chelle, tant la mer estoit encore
grosse, & le vent furieux, quoy
qu'il eût bien diminué.

Le Dimanche apres midy,
beaucoup trop tost pour nous,
on met les voiles au vent, si in-
constant, qu'il ne nous fut fauo-
rable que iusques à minuiet. De-
puis ce temps, nous courûmes
presque continuellement risque
de la vie durant plus de cinq se-
maines, pendant lesquelles nous
fûmes la pluspart du temps, costé
en trauers, errans tantost d'un
bord, tantost de l'autre. Les
iours de S. Thomas, S. Iean, des
Innocens, & le dernier de l'an-
née, nous furent les plus rudes.

nous ne portions point de voiles ; la brune ou broüillard estoit si épais , que nous ne pouuions voir à vn quart de lieuë de nous , tousiours en crainte d'estre iettez contre la terre. Nous desirions relâcher encore vne fois , tantost à belle Isle , puis à Brest , ou quelque autre part de France ou d'Angleterre ; puis à Sorling , petite Isle proche & des appartenances d'Angleterre : Nous la veismes d'assez près , mais nos Gouverneurs ne la connurent pas , & firent promptement mettre le cap à l'eau pour s'en retirer , sans scauoir où nous estions , iusques à ce que en punition de ce que mal à propos , & contre raison , le Pilote le voulant , nous nous estions opiniaistrez à tenir la mer , nous fusmes portez dans la man-

che ou canal de Bristoc, inconnu à nos Nauigateurs.

Le matin du iour des Roys, vn coup de mer nous mit tous au desespoir de nos vies, & plusieurs en meilleur estat de leur conscience par la Confession: Il heurta si rudement nostre vaisseau, qu'on creut qu'il étoit creué, d'autant plus asseurement, qu'il fut prés d'une heure à se redresser; emporta nostre chaloupe qui estoit fort bien amarrée sur le pont, les lices des deux costez du vaisseau, les brimbales des pompes, le foier, de ferla nos voiles, ietta vne merueilleuse quantité d'eau dans le nauire, & fit mille autres maux; on voulut couper le grand mas, mais il ne fut pas necessaire. C'estoit au poinct du iour qu'heureusement

on aperçeut vne petite Isle de la domination d'Angleterre, nommée Londey, qui nous pouuoit couvrir du vent d'Oüest nostre ennemy : la rade estoit assez saine & bonne; nous y arriuons en fin avec mille peines, & anchrons avec la joye ordinaire aux personnes échappées d'un tel danger.

Le iour neantmoins ne nous fut pas iour de resioüissance, Dieu ne permettant pas que nostre ioye durast longuement. Le soir vn furieux vent de Nord, duquel nous n'estions pas à couuert, nous attaque avec telle violence, qu'on croyoit que le vaisseau couleroit bas sous son amarré, l'eau entroit presque iusques à la dunette; on leua la hache pour couper le cable sur l'écubier, & nous mettre à la mercy du vent,

& de la mer; si on l'eût fait, nous n'auions qu'à peine vne heure de vie, le vent nous portant contre des rochers; nostre anchre chassa, & par vne faueur signalée du Ciel, nous rendit au lieu le meilleur de toute la rade, & tint bon, quoy que ces horribles secousses l'eussent presque entierement brisée en deux endroicts, comme on connut lors qu'on la leua. Au bout de deux heures le vent s'appaisa vn peu, qui auoit aussi bien fait du rauage en terre qu'en mer, abattant les arbres, cheminées, & maisons.

Le lendemain septième de Ianuier au matin, on tira quelques coups de canon pour auoir vn Pilote de l'Isle, mais c'estoient pauvres gens, qui n'auoient non plus de bateau pour venir à nous,

que nous pour les aller querir,
& n'y auoit parmy eux aucun pi-
lote.

Il falut neantmoins sortir de là,
quoy qu'aucun de nos Comman-
deurs ne connut la coste, ny le
port voisin: Nous l'allons cher-
cher au hazard avec tant de dan-
gers, que le Capitaine parla d'é-
choier, & pouffer le plus auant
qu'on pourroit le vaisseau vers la
terre, pour sauuer au moins les
hommes; Dieu ne nous vouloit
pas si peu de bien: Il nous fit en
fin trouuer l'entrée du haure de
Habledol, qui va iusques à deux
petites villes nommées Bedifort,
& Barnestable, ou bastable. C'est
vn méchant haure de barre, &
qui assèche; nous passâmes la
barre à deux tiers de flot, que
semblables vaisseaux, qui tirent

beaucoup d'eau, ne passent qu'à
plaine marée; & au lieu de pren-
dre à main droite vers la ter-
re, nous allons sur des sables,
où nous touchasmes plusieurs
fois; deux chaloupes, An-
gloises nous redresserent vn peu.
Les Anglois qui nous veirent, &
sçurent nos fortunes, disoient
que c'estoit miracle que nous
fussions réchappez. On nous
manda de Londres que trois cens
vaisseaux s'estoient perdus du
mauvais temps que nous auions
souffert. On nous rapporta que
le ministre d'un lieu voisin auoit
presché que nostre deliurance
estoit merueilleuse, mais qu'il ne
la falloit pas attribuer aux prie-
res que nous auions fait à la Vier-
ge nostre Dame, mais à celles que
nous auions fait à Dieu; C'est vn

franc ignorant.

Nous voila donc en Angleterre, où nous perdons vn beau temps & bon vent qui vint après trois ou quatre iours. Nous demeurons six semaines parmy des gens pauvres, superbes, & barbares aux estrangers, attendant de Londres & d'Exestre de l'argent pour remettre le vaisseau en estat, & cependant faisons de nouuelles auaries; vn nauire nous rompt vn anchre, nous rompons la fleche d'vn autre qu'on nous fait bien payer, nostre charpentie tombe & se noye dans la mer, comme vn autre charpentier s'estoit déjà noyé dans la riuere de Loire, quelques ieunes garçons s'enfuyent, & se sauuent: On fait croire à l'équipage que le vin des vitailles estoit finy, & ne

reſtoit que celui qui eſtoit deſtiné pour traiter , & ainſi on le met à la biere , on eſt contraint d'accommoder deux matelots , l'un Anglois , & l'autre Eſcoſſois , le vaiſſeau n'eſtant aſſez fourny pour ſes grandes manœuvres. Vn ſeul bien nous arriua en ce pays , c'eſt que les malades du mal de mer y treuverent leur ſanté ; & le reuerend Pere Suffren à qui j'auois écrit l'éſtat où nous étions , obtint de la ſereniſſime Reyne d'Angleterre dix Jacobus , & nous les enuoya ; les RR. PP. Capucins en eurent la moitié : Dieu ſoit la recompenſe de ſa Majeſté.

Nous n'eſtions pas encore à la fin de nos maux & de nos apprehenſions. lors que nous nous diſpoſions à partir, nouuelles nous

arriué de plusieurs endroicts, que le bruit de nostre arriuée en ce haure porté par toute l'Angleterre, auoir fait partir vn Dunquerquois, qui estoit à Plemeur, sur l'esperance d'vn bon butin, & qu'il nous gardoit entre Londey, & la barre, en dessein d'y demeurer plustost trois mois, que de nous laisser échapper. Son nauire estoit monté de plus de vingt pieces de canon, & six vingts hommes, entre lesquels y en auoit deux de ceux qui nous ayant abandonnez, auoient fait le rapport de nostre estat & foiblesse; & de vray, quelques vns de nos gens auoient aperceu de dessus les montagnes voisines vn grand vaisseau qui alloit & venoit deuant la barre. Nos Gouverneurs au commencement

ne vouloient rien hasarder ; mais si faut-il , ou sortir de ce port , ou y vendre nostre vaisseau , comme quelques Anglois croyoient que nous ferions ; & possible pour nous y contraindre qu'ils auoient controuué cette nouuelle.

Au sortir nous approchâmes si près des rochers cachez sous l'eau, que nous fûmes en grand danger ; nous ne rencontrâmes pas en sortant le Dunquerquois, mais sur le soir on aperçeut vn vaisseau vers Londey , qui fut cause que la nuit nous nous detournâmes de nostre route pour le tromper, bien contents d'estre en quelque assurance qu'il ne nous attrapperoit pas. Mais vn nouveau malheur troubla encor ce peu de contentement. Le Pilote entre en la chambre tout éperdu,

disant qu'il y auoit dans le vaisseau vne ou plusieurs voyes d'eau, & qu'on venoit de tirer pour vne fois huiet cens bastonnées, quoy qu'il n'y eut pas long téps qu'on auoit ietté l'eau. Voila l'alarme bien chaude au quartier; on prend resolution de relâcher pour la troisiéme fois, & aller à Kinsal, qui est vn tres bon haure en Irlande, nous perdons trois iours à le chercher: la nuit nous nous en retirons, lors que le vent est impetueux, de crainte qu'il nous iette contre terre durant les tenebres. Le mercredy des cendres au matin, nous en eufmes connoissance d'assez prés, & à la veuë du port tant désiré, nous changeons de resolution. Le vent estoit propre pour nostre route: on craint que la plus grande par-

tie de l'équipage n'abandonne le vaisseau en vn voyage si fâcheux & malheureux: Le Pilote public que les voyes d'eau sont decouvertes, qu'on les peut aisément étancher dans quelques iours, durant lesquels on iettera l'eau à tous les horologes, c'est à dire, de demie heure en demie heure, les passagers le iour, & les matelots la nuit; & sur cela on passe outre.

Le matin du troisiéme de Mars, nous aperçeusmes cinq vaisseaux, trois chasserent sur nous tout le iour, & partie de la nuit: Nous les prenions pour Turcs; nonobstant qu'ils eussent mis le pavillon de Hollande; nous ne pouvons nous y fier, les Turcs usants souvent de cette ruse de mettre vn autre pavillon que le leur:

Eux nous prenoient pour Espagnols, quoy que nous eussions mis le pavillon blanc; & ils avoient quelque raison, pource qu'il nous voyoient fuyr vers l'Espagne, où on sçait bien que les François ne seroient pas les bien-venus. Ils nous ioignent au second quart de la nuit; & après qu'on eut demandé & répondu de part & d'autre d'où estoit le navire, ils nous tirèrent deux coups de canon; peu s'en fallut que nous n'en rendissions autant, mais la partie n'étoit pas égale; c'étoient grands vaisseaux, qui avoient deux fois plus de canon & d'hommes que nous, & alloient partie à Fernambouc, & partie courir le bon bord. Ils nous firent amener les voiles, & demeurer avec eux iusques au
jour

Jour, nous gardant soigneusement toute la nuit. Le matin nostre Capitaine alla à leur bord, monstra sa permission, & puis bons amis. L'Admiral demanda vne barrique de vin pour contenter ses gens, fâchez d'auoir si long temps chassé en vain: Il nous promit compagnie tandis que nous ferions mesme route; mais elle ne dura pas long-temps, dautant que son nauire alloit fort bien au liêt du vent & le nostre fort mal; de sorte que nous fusmes la nuit en grand danger pour auoir trop porté de voiles afin de le suiure. Le lendemain vn de nos meilleurs matelots faisant quelque manœuvre tomba dans la mer, & ne fut possible de le sauuer, le vaisseau passoit si tost qu'en moins de rien il l'eut trop éloigné. Ces acci-

dens & les precedens, si funestes à quelques vns, & facheux à tout l'equipage, furent salutaires à d'autres, à qui Dieu donna durant vne petite exhortation & remonstrance faite à cette occasion, de fortes pensées de leur salut. On renouuella les deffences de iurer, proferer de fales paroles, & s'absenter de la priere: Quelques coupables furent punis, & Dieu sembla satisfait de ces bonnes resolutions, nous donnant dès l'heure fort beau temps, qui ne nous quitta plus. Nous chassâmes durant ce beau temps sur vn vaisseau: bien nous prit que c'estoit vn Anglois, & non vn ennemy: car il estoit beaucoup plus grand que le nostre & meilleur, & nous estions à la portée du mousquet que nous n'auions pas deux ca-

nous paréz; c'estoit nostre ordinaire: de loing tous les vaisseaux nous sembloient petits, & auoir peur de nous: c'estoit merueille combien nous estions vaillans: mais de prés, s'il en eust fallu decoudre, nous eussions bien laissé du poil. Vn honeste homme qui estoit avec nous & sçauoit bien le mestier, dit fort à propos, que ce n'estoit pas à nous à aller querir des vaisseaux; ny faire la guerre.

Le troisieme Dimanche de Carefme nous eusmes cognoissance de l'une des Canaries appelée Fortauanture, ou Portauanture, que nous approchasmes en dessein d'y aborder s'il y eust eu commodité pour remedier aux voyes d'eau; il n'y faisoit pas bon. Le soir, la brune estant cessée, nous vismes de loin quelques au-

tres isles. Sur le mesme dessein de boucher les voyes d'eau, nous allons chercher celles du Capvert, particulièrement celle de Saint Vincent, & chassons en chemin sur deux Holandois aussi judicieusement que nous auions chassé sur l'Anglois. Nos navigateurs nous mirent trois nuits à la cappe, de peur d'aborder la terre durant les tenebres, de laquelle ils se faisoient fort proches, & se trompoient: Ils la manquerent, & ne virent ces isles ny de près ny de loin, ny de iour ny de nuit. On les auoit bien aduertty de la declinaison de l'Aimant & de leur erreur; mais leur humilité reformée ne permettoit pas qu'ils le reconnussent ou voulussent apprendre quelque chose d'un Ieuiste. Ils se tromperent aussi en

leur estime, & eurent la honte, que le mesme Pere predict qu'on verroit la terre de l'isle de la Barboude plus de vingt-quatre heures plustost qu'ils ne disoient. Nous apperceusmes donc la Barboude le Samedy deuant le dimanche des rameaux, & y arriuâmes ce bon iour. Durant cette trauerse nous consolions la crainte des calmes de l'esperance de la pesche ; mais Dieu nous donna tousiours assez de vent : de trois marsoins que nous blessâmes nous n'en eusmes qu'un, & quelques poissons volans qui donnerent la nuit dans nos voiles & haut-bans, & vne dorade ; c'estoit vn beau poisson de trois pieds de long, le dos estoit d'une couleur verte fort éclatante, le ventre jaune doré semé de petites estoiles

bleuës : il auoit dans le ventre quantité de petits poissons encore tous entiers, & vn poisson long d'un pied, qui a le bec crochu comme le Perroquet, & la peau couuerte de pointes fort aiguës, qui l'ont fait nommer poisson armé. Le dimanche des rameaux pour nous faire faire la Semaine Sainte plus aufterement, on nous mist à l'eau dont la pluspart estoit gatée.

L'isle de la Barboude est bien de douze lieuës de tour au moins, sa figure tire sur l'oualle; les arbres ont esté conseruez tout au tour de l'isle sur le bord de la mer, pour y dresser des embuscades aux ennemis qui voudroient en chasser les Anglois qui la possèdent. Ceux cy nous firent deffences, & aux Reuerends Peres Capucins, de

faire aucune fonction de nostre religion dans leurs terres. Elle estoit en trouble, le Gouverneur ayât fait refus de receuoir vn successeur, y estoit arresté & deuoit estre mené en Angleterre par arrest du conseil. Son predecesseur luy auoit fait le mesme refus, & ayant esté pris par luy, auoit passé par les armes. On disoit neantmoins que celuy-cy estoit fort habile homme, & auoit eu quelque raison de faire ce qu'il auoit fait, & se iustificeroit bien. Là nous apprismes l'irruption des Sauuages dans la gardeloupe qui est aux François, dans Antigoa, Monferrat, & autres isles de la domination Angloise. N'y ayant rien trouué à faire pour le marchand; nous en partismes le Mardy la nuiët, nous vismes nostre Marti-

nique sur le soir du Mercredy. Le Jeudy on nous mene à l'ance du diamant, pour auoir de la tortuë, qui commençoit à terrir, nous rodons par cette belle ance pour trouuer vne place à ietter l'ancre, puis tout d'un coup le maistre ou Pilote changeant de volonté, fait passer outre, & dit que dans six heures il nous feroit mouïller l'ancre deuant la maison de monsieur le Gouverneur, qui estoit bien à huit lieuës de là: Il ne le fit pas, car vne heure apres il nous fit arrester à enuiron vne lieuë du diamant: Dieu vouloit que nous y arriuaßions le Vendredy saint, pour mettre fin à nos trauaux de mer presque à la mesme heure, que Iesus termina les siens en l'arbre de la Croix. Monsieur du Parquet gouverneur de l'isle

nous y receut fort courtoisement,
nous logea dans la case de son
Aumosnier, au refus que nous
fîmes de demeurer en sa maison,
où nous luy eussions trop rendu
d'importunité, iusqu'à - ce que
suiuant les ordres des Seigneurs
de la Compagnie, il nous eust assi-
gné vne place pour nostre habi-
tation, ce qui ne se fit si tost que
nous eussions desiré, pour ne luy
estre à charge. La cause princi-
pale du retardement fut le dessein
qu'il auoit fait d'aller & mener
nombre d'hommes bien armez à
la pesche de la tortue, si on la
doit appeller pesche, y establir
des corps de garde pour la seure-
té des pescheurs, & apprendre si
on auroit guerre contre les Sau-
uages. Ce qui faisoit croire qu'ils
nous attaqueroient estoit la mort

de leur grand capitaine Kaïerman, que monsieur le gouverneur auoit retenu prisonnier iusques à ce qu'il eût fait rendre deux Sauuages de la terre ferme, que ses gens auoient enleué des François. La nuit ce prisonnier se sauua, & brisa les fers qu'il auoit aux pieds, on ne sçait comment; mais estant dans les bois, il fut mordu d'une vipere; & n'ayant pour lors aucun remede, s'en alla mourir arriuant parmy les siens. On croyoit donc qu'ils vouloient venger sa mort; mais ils n'y ont pas pensé, ou n'ont osé l'entreprendre. Ce bruit estant appaisé & monsieur le gouverneur de retour, il prit la peine d'aller luy-mesme le dernier iour d'Auril au lieu où il nous a assigné nostre habitation, & de faire commen-

cer à couper les arbres pour decouvrir la terre, & le treizième de may nous allasmes demeurer proche de là, pour y commencer nos fonctions, à la gloire de Dieu.

*De la situation de l'Isle de la
Martinique.*

CHAPITRE II.

LA Martinique, ou Martini-
no, vne des Antilles, autre-
ment nommées Camercanes, est
en la zone torride par quatorze
& quinze degrez de latitude Se-
ptentrionale. On ne sçait encore
au vray combien elle a de tour:
quelques vns qui se croient sça-
uans en cecy luy donnent vingt-

cinq lieues de long, & huit ou dix de large ; elle a pour isles voisines celle de Sainte Luce dite Sainte-Louise, tenuë par les Anglois, qui est à six ou sept lieues, & la Dominique éloignée d'environ dix lieues, peuplée encore des Caraïbes, ainsi s'appellent nos Sauvages. D'icy on peut aisément inferer que nous auons deux fois l'année le Soleil à pic sur nos têtes, & pour Zenith dans les mois de May & d'Aoust : que nos iours ordinaires sont de douze heures, & n'ont point d'inégalité fort sensible : que les chaleurs y sont grandes & continuelles ; les secheresses quelquesfois bien longues ; ces chaleurs sont tempérées par la fraischeur des nuicts. Les nuages & pluyes sont plus frequentes aux mois d'octobre,

Novembre & decembre qu'aux autres temps, & ces trois mois à cause de leur humidité composent icy l'hyuer: car pour le froid, puis qu'il en est banny, il n'est pas capable de faire icy vne diuerse saison, qui porte le nom d'hyuer: De là vient aussi que la verdure est toujours aux arbres, si la trop grande seicheresse ne les despoille de leurs feüilles, comme il arriue assez souuent.

L'Isle est diuisée en deux parties; l'une qu'on appelle la Cabesterre, qui est au dessus du vent, & possédée par les Caraïbes; l'autre peuplée des François, appelée la basse terre, ou les grands sables: que si cette basse terre à quelque aduantage sur la Cabesterre pour l'abord des vaisseaux, & vne rade fort saine; elle luy est

aussi reciproquement inferieure en beauté & commodité; la Cabestre estant plainé, vnüe, & égale, au lieu que nostre basse terre est raboteuse, & diuisée par des montagnes, qu'on appelle icy mornes, fort aspres, rudes, & difficiles, qui fait que les habitants sont plus éloignez les vns des autres, & ne se visitent pas si souvent & si aisément.

Nos terres habitées, à raison de ces mornes, sont diuisées en trois estages; celles qui sont les plus basses & proches de la mer, s'appellent habitations du premier estage; les autres qui vont au pendant des mornes, du second estage; & celles qui sont au de la & au dessus des mornes, sont nommées le troisieme estage: car il y a quelques habitations sur les mor-

nes plus bas & moins rudes à monter ; les pitons ou sommets des plus hautes montagnes demeurent pour les bois , & leurs hostes, les couleures, viperes, lézards, & oyseaux. Mais encore de ces mornes si fascheux nous retirons vn bien incōparable, sçauoir est, bon nombre de petites riuieres ou ruisseaux qui coulent d'en haut, & ont de la pente & des cheutes propres pour des moulins; l'eau en est fort bonne & fraiche, & nourrit quantité de grosses eschreuisses, anguilles, & autres poissons. Il y a aussi dans cette Isle de belles anses de sable ou la tortuë terrist. Nous y auons vn grand cul de sac où est le fort Royal, & vn fort beau lieu pour le cranage des vaisseaux. Il y a aussi vne saline, qui si elle estoit accom-

modée; ce qu'on pourroit faire fort aisément & à peu de fraiz, porteroit de grandes commoditez; d'autant qu'outre la fourniture des habitans, il y auroit du sel pour traiter avec les estrangers. Les pierres, la chaux, la brique ny manqueroient pas, s'il y auoit des ouuriers pour les mettre en œuvre, & si on s'en vouloit seruir: mais partie la pauureté des habitans, partie le manquement d'ouuriers, & en partie aussi le peu de necessité qu'il y a de se mieux couvrir, le chaud y estant continuél, ont fait negliger ces commoditez pour se contenter de cases, à la mode des Sauvages, faites de roseaux, ou pieux, couuertes de feüilles de palmistes, roseaux, & autres. Pour le bois, toute l'Isle en est couuëte, à la reserve de ce
que

que les François & Sauvages descouurent pour leurs habitations & iardins : mais presque tout le bois est sujet aux vers, d'où vient qu'il y en a peu de bien propre à bastir, & encore moins pour faire nauires. Il est vray qu'en ces mers icy le ver gaste aussi bien le bois de France que celui du pais ; c'est pourquoy il faut faire vn doublage aux vaisseaux qu'on y enuoye pour y demeurer quelque temps.

Les vents plus ordinaires icy viennent de la terre ; ils ne sont pas grands, sinon que quelquesfois, & assez souuent, il vient des rafales, ou vents de peu de durée, mais fort impetueux ; c'est pourquoy afin de se couurir, & n'estre emporté à vau le vent, comme quelques-uns ont esté, les vaisseaux arriuant rangent la terre à la portée

du pistolet, la rade estant bonne & saine, & les matelots ont tousjours la main à l'escoute pour amener les huniers lors qu'il est necessaire. Les ouragans, ou vents extraordinairement furieux, qui font tout le tour de l'horison, abbattent les arbres, & les maisons, de sorte que fort peu en escappent; ne se sont fait sentir icy avec tant de violence qu'à d'autres isles, non plus que lestonerres, & tremblemens de terre.

*Entrée & establissement des François
en cette isle.*

CHAPITRE III.

Cette isle, & autres voisines, ont iadis esté veuës, & non

pas habitées, par Christophle Colomb, & ses espagnols, qui ayant sçeu que les naturels du pays estoient canibales & anthropophages, qui ne trouuoient aucune chair plus delicate que celle de leurs ennemis, ne désirant si tost mourir, passerent outre pour chercher quelque meilleure fortune. Les François ont esté, comme on croit, ceux des Europeans qui l'ont habitée les premiers. L'an 1635. feu monsieur de Nambuc gentil-homme François gouverneur de l'isle de S. Christophle, homme d'esprit & de iugement, & fort entendu à faire de nouvelles peuplades, & establir des colonies en ces isles; enuoya le sieur du Pont accompagné d'environ quatre-vingts soldats, avec ordre d'habituer la Martinique, & peu

apres autre quarante hommes
sous la conduite du sieur de la
Vallée, qui deuoit estre Lieute-
nant, & est maintenant premier
capitaine de l'isle. L'entreprise
estoit hardie, & l'exécution diffi-
cile; l'affaire ne se passa pas sans
noises, & combats avec les Sau-
uages habitans de l'isle, assistez de
leurs voisins, de la Dominique,
S. Vincent, & autres; quelques
François y laisserent la vie: La di-
sette & manquement de viures
mit les autres bien en peine, & les
contraignit en cette extremite, de
viure de fruiçts sauvages, racines,
& toutes sortes d'animaux des bois
proches, n'osant s'eloigner de
crainte des Sauvages, qui de leur
part faisoient tout le possible pour
se maintenir en leur possession, &
en chasser nos François: que s'ils

estoyent contrains de se retirer, à mesure qu'ils quittoient quelque lieu descouvert & planté ils mettoient le feu partout à leurs cases, & aux viures qui estoient sur terre, pour en priver les nostres, qui aussi ne manquoient à en planter partout où ils pouuoient, autant que l'ennemy leur permettoit, mais c'estoit pour le temps à venir, & le present, qui estoit celuy de leur disette, n'en estoit pas soulagé. Nonobstant ces difficultés, dans quelques mois nos gens viennent about de leur dessein avec l'ayde de Dieu, & s'emparent de la partie de l'isle, où ils sont maintenant, y plantent & bastissent à la mode du pais. Les Sauvages Caraïbes se retirent, les vns en l'autre partie de l'isle, nommée la cabesterre, les autres aux isles

voisines ; tous avec resolution de n'en demeurer pas là , & de revenir avec plus grandes forces pour chasser les François : mais ayant apres quelque temps recogneu leur foiblesse & impuissance , ils parlerent de quelque accommodement , & la paix fut faite telle qu'elle peut estre avec ces infidelles. Le sieur du Pont s'embarqua pour aller rendre compte , & porter cette bonne nouvelle à Monsieur de Nambuc , & par mesme moyen se pourueoir de viures & autres commoditez. Il est porté à vau le vent és terres Espagnoles , où il est trois ans prisonnier. Durant ce temps , n'en ayant eu aucune nouvelle , on le croit perdu , & monsieur de Nambuc se voyât proche de la mort pouruoit du commandemât de l'isle monsieur

du Parquet l'un de ses neveux, que messieurs de la Compagnie luy ont confirmé. C'est vn braue gentil-homme, & bien pourueu de toutes les qualitez necessaires à cette charge. Il y entra, & s'y est maintenu iusques à present, avec tant d'adresse, sagesse, & conduite, qu'il a gagné le cœur aussi bien aux Sauuages Caraïbes qu'aux François. Les Sauuages le visitent souuent, & le voyent volontiers en leurs cases, l'appellent leur compere, & le grand capitaine du Parquet: & celuy qui est le premier capitaine parmy eux, que nous appellons le pilote, à pris son nom; c'est la coustume de ces Sauuages de prendre le nom de leurs bons comperes. Il fut il y a quelque temps les visiter, ils le receurent fort honestement à

leur mode, le recourent, accommodent les cheueux à leur façon, firent dancier comme eux, & n'oublierent rien qu'ils iugeassent necessaire pour luy tesmoigner de l'affection : Je dis tesmoigner de l'affection, & non pas rendre de l'honneur ; d'autant que ces barbares sont si vains, qu'ils se preferent à tous les hommes du monde, & ne font honneur à personne, par lequel il semble qu'ils se recognoissent inferieurs; au reste toutes ces ceremonies se font de telle sorte, que monsieur le gouverneur, & ses gens demeurent tousiours arméz, & le pistolet à la main, pource qu'il n'y a iamais d'assurance parmy ces Sauuages quelque bonne mine qu'ils vous fassent.

Nos François peuuent estre

maintenant près de mille habitez le long de la mer, entre les mornes & au dessus, en l'espace de huit ou neuf lieuës. La crainte des couleuvres ou viperes, dont nous parlerons, a destourné plus de deux mille hommes d'y venir; on se desabuse peu à peu, & desia plusieurs feroient à la Martinique, s'ils auoient le moyen d'y aller. Nous y auons trois forts: le Royal est le meilleur, & plus considerable: il est dans le cul de sac dont nous auons parlé, en vn lieu & assiette fort auantageuse: Il est muny de canon, & y a garnison suffisante. L'Espagnol s'y presenta il y a quelques années; mais sans autre effect que du bruit, & sans en remporter que de la confusion.

J'ay parlé au chapitre precedent

des maisons. Les François n'ont pas esté plus curieux de la bonté & mollesse des lits de France, que de la beauté des maisons: Ils couchent dans des lits de coton suspendus, qu'on appelle des hamats, qui seruent encor de siege durant la iournée; ce sont ouurages des Sauvages. Les habitations sont iusques à maintenant esloignées les vnes des autres sans aucune forme de bourg, tant à cause des mornes qui les separent, qu'à cause que chacun veut demeurer sur sa terre. On pretend y en former bien-tost vn proche du fort S. Pierre où la place est belle: l'Eglise y est desia, on y fera aussi l'auditoire, & autres oeuvres publics.

*Des commoditez que l'isle peut
fournir.*

CHAPITRE IV.

NOUS parlerons en ce chapitre & en quelques autres suiuaus autât par le rapport d'autrui que par experience. Le peu de temps qu'il y a que nous sommes en cette isle ne nous ayant donné le moyen de voir de nos yeux tout ce qu'on nous disoit de ses commoditez. Suffit que nous en ayons veu vne partie, & que l'autre soit si auerée par la constante relation de tous les habitans, qu'il n'y a aucune occasion d'en douter,

Nous auons desia touché les commoditez pour bastir: ie parleray en suite tant des biens qu'el-

le possède de luy-mesme, & presentement, que de ceux qu'elle n'a pas encore, mais dont elle est capable, & qu'on luy peut aisément, & doit-on à mon aduis procurer au plustost, & sans lesquels il n'y a presque rien à faire; pource qu'il est croyable que partie de ce qu'elle a de luy viendra peu à peu à manquer, comme il est aduenü autre part, à mesure que le nombre des habitans croistra.

Generalement plusieurs personnes qui ont passé bonne partie de leur vie en la navigation de ces isles, assurent que celle-cy ne cede de beaucoup à aucune des isles des Caraïbes, tant pour ce qui est des viures & nourriture, que pour le profit qu'on en peut tirer, si les François sont aussi auisez & in-

ustrieux à faire valoir la terre,
que les autres nations. Pour le fai-
re voir en particulier commen-
çons par les herbes.

Il y a quantité d'herbes medi-
cinales, sans parler des fruiçts,
dont plusieurs ont de la vertu: Le
gaïac, la schine, la scolopandre,
dont les feüilles sont de six & sept
pieds de long, & mille autres plus
rares, qu'un homme versé en la
cognoissance des simples scau-
roit bien remarquer, & qui se-
roient de bon debit en France.
C'est merueille combien les Sau-
uages se portent bien, & ont de
beaux secrets; mais il est impossi-
ble de les tirer d'eux, si ce n'est à
la longue, & par quelque finesse.
Les gouttes, pierres, & plusieurs
autres maladies trop communes
en France, sont icy presque inco-

neuës, tant ils y remedient promptement & efficacement : si les blesseures ne sont mortelles, ils les guerissent si facilement & parfaitement, que vous voyez celuy que vous pensiez mort, retourner dès le lendemain avec les autres à la guerre. Ils ont vne herbe qui dissout les taves des yeux : ils guerissent les fievres avec vne goutte ou deux du ius d'une herbe qu'ils distillent dans l'œil ; quelques François en ont fait l'experience, & resseny l'effect qu'ils desiroient, comme entr'autres vn des gens de monsieur le gouverneur, qui m'en a luy-mesme asseuré. Ils ont des herbes ou racines, qui aydent merueilleusement les femmes qui sont en travail d'enfant, & les font heureusement accoucher ; & d'autres par l'usage des

quelles des femmes qu'on croyoit
steriles ont conceu, & eu lignée:
pour la morsure des couleuvres,
ou plustost viperes, dont nous
parlerons, ils n'en ont point de
crainte, d'autant qu'ils s'en gua-
rissent sans difficulté.

Venons aux herbes dont on
mange: celles du pays sont les
choux, que nous appellons carai-
bes, qui ne sont point mauuais:
les feuilles des patales dont on
nourrit les animaux en quelques
endroits, sont bonnes au potage,
& le bout de leur rejetton passe
pour des asperges, ayant telle-
ment le mesme goust, que si on
le mangeoit sans le voir, on croi-
roit manger des asperges. Le cœur
du haut des palmistes, qui est le
commencement & la naissance
des feuilles nouvelles, blanc com-

me de la chicorée bien apprestée, est fort bon en salade, & au pot sans comparaison meilleur que nos choux de pomme. Le pourpier vient en si grande quantité par les champs, qu'on le tient pour vne mauuaise herbe, à cause qu'il nuit aux autres; il n'est pas si bon que celuy de nos iardins: les autres herbes du pays ne nous sont pas encore cogneuës.

La plus-part des herbes de nos iardins de France y viennent bien, comme laitues, chicorée, oseille, persil, choux, oignons, & autres; les concombres tres-bien. Pour les melons semblables aux nostres, en six semaines ou deux mois vous les auez tres-bons, & ordinairement plus gros qu'en France. I'ay dit les melons semblables aux nostres; d'autant qu'il y en

y en a d'autres, qu'ils appellent melons d'eau, qui ne sont pas de si bon goust que les nostres, mais qui desalterent & rafraichissent grandement; ils ont beaucoup d'eau, c'est à mon aduis ce qui les a fait nommer melons d'eau: ils ont la chair rouge, & sont gros comme citrouilles mediocres, non pas si longs, mais plus ronds, de si facile digestion qu'un homme en peut manger un tout entier sans crainte de s'en trouver mal. Plusieurs herbes icy, tant de celles du pays, que de celles de France, ne portent point de graine; possible que l'industrie & l'artifice pourroit supplier à ce defect, & leur en faire porter, comme l'experience a fait voir en quelques uns; mais il n'en est de besoin, la nature y ayant pourueu par vne

autre voye, d'autant que ces herbes comme les choux & autres poussent quantité de rejettons, qu'on plante, & qui viennent fort bien.

Les pois ronds de France y viennent bien; on n'en fait pas grand estat, d'autant qu'il y a vne merueilleuse quantité de ces pois, que quelques-vns appellent pois de Rome, autres des fesoies, autres haricots, qui portent en six semaines, excepté de petits, qu'ils appellent pois Anglois, d'autant que les Anglois sont les premiers qui en ont apporté, nō pas d'Angleterre, mais de la terre ferme de l'Amerique; ceux-cy ne portent que dans deux mois, ont bien meilleur goust, & font meilleur potage que les autres, on en mange aussi en salade. Il y a en quel-

à la Martinique.

31

ques endroits des pois d'angole —
semblables à nos lentilles; ce sont
les delices des Negres ; ils iettent
comme vn petit arbrisseau qui
dure six ou sept ans, au bout des-
quels il en faut semer d'autres :
on en trouue plus grande quan-
tité à saint Christophle qu'aux
autres isles. Il y a aussi des pois
gros & plats , rouges & blancs,
qui iettēt vne belle verdure pour
couvrir des tonnelles de iardin, &
durent quatre ans. On ne manque
point d'ingrediens, qui seruent là
au lieu de poiure pour les sausses.

Quant aux racines, les patales,
de la feuille & reiettons desquel-
les nous auons desia parlé, sont
d'ordinaire plus grosses que nos
naueaux, & de beaucoup meilleur
goust: les Anglois de saint Chri-
stophle n'ont point d'autre pain

pour la plus-part: elles sont iaunes au dedans, il y en a aussi de rouges & de blanches: on les fait cuire dans la cendre, & en vn chaudron avec peu d'eau, & faut le couvrir afin qu'il ne prene point d'air, si faire se peut: elles sont de bonne nourriture, & on s'en sert encore pour le hoüicou, ou la boisson du pays, comme nous dirons. Il y en a qui sans autre meslange en font de la boisson, mais elle n'est pas si bonne que celle qu'on fait de cassaue.

Le manioc est vne espeece d'arbrisseau de cinq ou six pieds de haut, dont les feuilles ressemblent aucunement à celles de nos osiers ou saules: on le prouigne plantant en terre des bouts de bois de la longueur d'yn pied au plus. Il porte vne racine grosse comme

nos plus grosses bettes-raues, mais blanche: que si on en veut auoir de iuste grosseur, on attend vn an. Apres auoir nettoyé ou raclé cette racine, on la grege ou reduit en grosse farine avec vne sorte de raspe platte, qu'on appelle grege, puis on la met en presse pour en tirer toute l'eau, qui est vn dangereux poison: apres on met cette farine sur vne platine de fer sur le feu, comme on fait les galettes de bled noir, & on retire vn grand pain, ou galette blanche comme neige, qui estant encore fraische a assez bon goust; lors qu'elle est dure, & gardée long temps elle en a fort peu: voila le pain du pays, qu'il ne faut pas manger chaud, d'autant qu'il nuiroit à la santé: il ne charge point l'estomach, mais aussi il ne

sustente pas beaucoup. On fait de ces galettes plus espaisſes pour porter dans les vaisſeaux ; & d'autres épaisſes d'un bõ poulce, pour faire du hoüicou, ou boiſſon du pays: on les met routes chaudes dans l'eau, ou bien on les fait pourrir entre des feuilles, puis on les met dans l'eau vn peu chaude, on les presse & manie pour en faire comme de la paste, puis on grege là dessus quelques patales, & cela ensemble boult vingt quatre heures, apres lesquelles on le passe, & le clair sert de breuuage, le marc est pour les poules, si ce n'est que quelques meſnagers y remettent encore de l'eau pour en tirer vn second hoüicou moindre que le premier, comme quãd on met de l'eau sur le marc du vin: & cette seconde boiſſon à cause qu'elle

ne vault gueres, est appellée dans le pays d'un nom qui vault encore moins. Le houïcou bien fait, cōme le font les Sauvages, est d'assez bon goust, & nourrissant, & pris par excez peut enyurer. La fertilité de ce manioc, dont vn champ nourrira beaucoup plus de personnes que s'il y estoit semé du bled, a fait negliger la culture de la terre, pour en retirer du froment de France; aucuns en ayant seulement ietté quelques grains deux ou trois doigts auant dans la terre, ont veu paroistre dans peu de temps des pailles hautes de douze ou quinze pieds avec vn espy au bout sans grains, qui leur a fait iuger, que ce pays n'estoit propre pour le froment. Il est croyable que si on y auoit apporté vn peu plus de façon, il ne vien-

droit pas mal aux lieux plus temperéz , qui sont au pendant des montagnes ; comme le bled d'Inde, ou maïs, le ris, & autres grains, orge, auoine, lin, chanure y viendront aussi à ce qu'on croit , & on l'a desia expérimenté de quelques vns.

Difons icy à l'occasion de la boisson dont nous auons parlé ; que la vigne y croist fort bien : elle porte deux ou trois fois l'année pourueu qu'on la taille à temps , & fort prés ; & si on auoit l'expérience des façons qu'il luy faut donner , & le choix des lieux où on la plante , & du temps de la planter , & tailler , elle porteroit ses raisins vn peu plus meurs que ceux qu'on void , & dont i'ay gousté à S. Christophle ; Il faudroit aussi porter de France, de bons pe-

pins, ou de bon plan, comme on peut sans difficulté.

La curieuse recherche des fleurs n'est pas encore arriuée iusques icy; La pauureté de la pluspart des habitans les fait songer seulement à ce qui est vtile. Il y a des amaranthes; des fleurs d'un rouge fort éclattant, qu'ils appellent cardinales; du iasmin dans les bois; i'en ay veu à la garde-loupe en passant, de trois ou quatre façons. Nous auons vne herbe qui porte de la graine musquée; vne autre appelée sensible, d'autant qu'elle se ferme, & flaitrit si tost qu'une personne l'a touchée, & est bien vn quart d'heure à reuenir, & se redresser.

*Continuation du mesme sujet , des
commoditez de l'isle.*

CHAPITRE V.

VEnons aux fruiçts & arbres fruiçtiers. Nos pommiers, poiriers, figuiers, cerisiers, abricotiers, peschers, noyers, chataigners, n'ont point encore paru en ces terres; on en a fait quelques experience, mais peu, & seulement aux lieux plus chauds : avec le temps on experimentera si aux endroits plus temperez on en pourra eleuer. Les fruiçts du païs, qui luy sont commun avec la France; sont les citrons, limons, & oranges: Il est vray qu'ils viennent icy en merueilleuse quantité de

toutes sortes , & fort beaux , & bons: les citronniers & limoniers portent en dix-huict mois ou deux ans , & les orangers en trois. Il y a de petits citronniers dont on fait les palissades , & de petits citrons qui ont l'escorce fort tendre , & sont si pleins de suc , qu'ils en rendent autant que deux autres des plus gros. Ces arbres viennent de pepin , & de branche. Il ne les faut ny greffer , ny enter; on met seulement vne branche d'oranger ou citronnier en terre , sans autre soing ny artifice. Les grenadiers y viennent beaux; mais pour en auoir du fruit il les faut ébrancher par le bas , & faire croistre en arbres. On ne doute point que les figuiers , oliuiers , & possible encore les amandiers , n'y profitassent ; mais personne n'y a eu

soin d'en planter. Il y a des acaïons de jardin bien differens de ceux du mesme nom qui sont dans les bois, dont nous parlerons plus bas ; ce sont arbres mediocres, qui ont vne feuille assez grande, & font vn grand ombrage ; ils portent des pommes douces, & de bon goust, qui ont quantité d'eau pour desalterer ; quelques-uns en font du vin, qui n'est pas de garde : au bout ou à la teste de ces pommes, il y a vn petit fruit, qu'on appelle noix d'acaïon : il a vne escorce dure, & épaisse ; on en tire de l'huyle, qui est bonne, à ce qu'on dit, pour les dartres, & le fruit qui est au dedans est petit, mais meilleur que nos noix, & nos chastaignes.

Mais il faut aduouër que ces isles ont le roy des fruits, & celuy qu'o

croit qui n'a point en Frâce d'égal en bonté, qu'on l'appelle anana: il sort du cœur d'une plâte ou herbe, dont les feuilles lōgues & estroites s'estallēt en rond comme l'artichaux: il a la figure d'une pomme de pin, mais il est beaucoup plus gros, la peau rude, & divisée par carrez tout de mesme que cette pomme; au pied quatre ou cinq rejettons, qui seruent de graine, qu'on plante à la pleine lune pour en auoir du fruit au bout de l'an: sa couleur est verte, tirant vn peu sur le iaune quād il est en maturité: il porte sur la teste vne touffe ronde de feuilles, qui luy sert comme de couronne pour marque de son aduantage & excellence sur tous les autres fruits: son goust a quelque rapport à celuy de la poire de bon

chrestien ; mais il est plus sucré, & a plus d'eau qui est tres-agreable. Il y a vne sorte de ces ananas qu'on appelle anana de pite, d'autant que de la feuille les Sauvageſſes tirent vn fil, qu'on appelle fil de pite, qui est fort bon, & ſans comparaison plus beau que le plus beau, que nous ayons, & les ouurages qu'on en fait peuuent paſſer pour des ouurages de ſoye.

Les bananiers ſont de la hauteur de quinze ou vingt pieds, ont le tronc touſiours verd, composé de diuerſes peaux comme nos oignons, la feuille large d'un pied, & longue de ſix ou ſept : ils ne portent du fruit qu'en vne ſeule tige, qui est toute reueſtuë de banans, il y en a bien quelquefois quatre vingts ou cent, & on appelle cela vn regime de bananes:

Ce fruit est long de demy pied, iaune en dedans, & de bon goust: on en met par cartiers seicher au soleil, ils les appellent des bananes cōfites, qui ont le goust de dattes, & meilleur. Les figuiers de ce pays sont semblables aux bananiers, & les figues aux bananes, sinō qu'elles ne sont si rondes, mais vn peu plus plattes & plus courtes, & n'ont pas du tout si bon goust.

Il y a encor quantité d'arbres dās les bois qui portēt des fruits, dont quelques vns ont assez bon goust, comme les pommes appelées gouianes, les papaies, les mainains, les cachimens, qui ont le goust de la cresse vn peu sucrée. Il y en a de ceux-cy & d'autres dont les fruits seruēt pour la medecine, & vne certaine sorte de pomme dōt les pepins gros com-

me de nos febues mediocres, sont de fort bon goust, & s'appellent noix medicinales, d'autant que si vous n'ostez vne petite feuille blanche qu'ils ont dans le cœur, ils purgent grandement, & pro-
uoquent aussi à vomir. Pour la plus-part des autres fruiçts qu'on trouue dans les bois, ils seruent à engraisser les perroquets, perdrix, ramiers, gruës, & autres oyseaux.

Les arbres sauuages sont la plus-part plus hauts que les nostres; il y en a peu qui soient propres à bastir, ou à faire des vaisseaux, d'autant que le ver s'y met: vray est qu'il n'espargne pas plus les bois de nostre Europe que ceux du pays, c'est pourquoy on donne vn doublage aux vaisseaux que l'on y enuoye; autrement le ver les perçant ils seroient en danger.

Le cœur d'acomat est bon pour la charpente; on fait des aix & de beaux ouurages de l'acaiou des bois, qui est de couleur rouge; & de bonne odeur.

On y trouue aussi d'autres bois rouges, dont la feuille est de bonne odeur: les arbres appelez courbaris portent vn fruit assez long, plat & dur; il y a au dedans avec la graine comme de la poussiere; qui a entierement le goust de pain d'espece, & nos François lors qu'ils habiterent l'isle dans leur disette y eurent recours. Trois ou quatre sortes de palmistes; les vns espineux, dont on peut tirer du vin agreable, mais qui ne se conserve qu'un iour ou deux au plus; les autres sans espines. On se feroit des feuilles de ces palmistes & autres arbres comme en France du

chaume pour couvrir les cases, & ajoupas, ou apentis. Les fauonettes portent vn fruit rond, gros comme des grosses noisettes; le dessus ou escorce epaisse d'un teston, est propre à sauonner, c'est pourquoy on la nomme fauonette; mais il en faut fort peu, autrement il brusleroit le linge, comme aussi feroient les cendres du pays, qui en mettroit beaucoup à la lessive: le dedans est vne petite noisette noire & dure, dont on peut faire de beaux chapelets. Nous y auons des arbres qui portent des calebasses grosses comme nos citrouilles mediocres, & s'appellent calebassiers; on se sert de ces calebasses pour apporter l'eau; ou on les fend en deux pour s'en seruir à boire. On appelle ces belles rasses des couis. Il y a encor d'au-

tres calebasses de diuerſes façons & figures, & plus petites, qu'on apporte en France pour mettre de la poudre, & autres choſes. Nous ne ſçauons point le nom de certains arbres, dont l'écorce pilée iette vne eſcume qui ſert aux Sauuages à enyurer les poiſſons, & les prendre lors qu'ils viennent à bord: ny de ceux dont ils ſe ſeruent pour faire du feu, frappant le bois l'un contre l'autre. Pluſieurs arbres portent des gommés; & ſans doute pluſieurs ſortes de ces gommés ſeroient en eſtime en France, & en ces iſles ſi on les cognoiſſoit bien, & leur vtilité: maintenant on ne ſ'en ſert qu'au lieu de glu, à l'exemple des Sauuages.

Le iunipa porte des pommes de meſme nō, qui noirciſſent ce qu'o y touche; de ſorte qu'il eſt preſque

impossible d'oster cette noirceur, mais elle disparoist d'elle-mesme le neufiesme iour. Les bois sont pleins de lienes qui pendent des arbres; ce sont comme quelque espee de lierre qui s'attache & rampe iusques au haut des arbres, puis n'ayant plus ou monter, iette du bois qui pend en bas iusques à terre, où il va chercher vn autre arbre pour y monter encore: ces lienes sont fortes, les Sauuages s'en seruent pour monter aux arbres, où autrement ils ne pourroient monter à cause de leur grosseur: on les fend aussi en quatre pour s'en seruir comme de cordes ou d'osiers pour lier les roseaux dont on fait les cases, & autres choses; à quoy sert aussi la seconde écorce d'vn arbre nommé mahault. Je n'aurois iamais fait, si ic voulois

rapporter toutes les sortes d'arbres des bois de ce pays: ie marqueray donc seulement, qu'il n'y en a aucuns de ceux qui nous sont communs en Frâce, comme chesnes, fresnes, fousteaux, & autres; aussi en France n'auõs nous point de courbaris, acomats, acaious, & autres semblables, qui sont les bois de la Martinique.

Nous auons parlé des bleds, grains, racines, & herbes de ce pays, desquelles on mange; reste à dire quelque peu des autres choses qui seruent à la nourriture des hommes. On a commencé à auoir des pourceaux, dont quelques-vns se sont fait marons, c'est à dire qu'ils ont fuy dans les bois, où ils multiplieront au grand bien de cette isle: car d'autres bestes à quatre pieds il n'y en a point, sinon

possible quelques rats musquez, & quelques agoustis ; ce sont petits animaux qui ont quelque chose de nos lapins. Il n'y a ny cerfs, ny sangliers, ny loups, ny renards. Si on enuoyoit ou transportoit là quelques vaches & brebis, on feroit vn tres-grand bien au pays ; & cela est necessaire, d'autant que la tortuë, les lezards, & autres animaux pourront aussi bien manquer là à mesure qu'on peuplera l'isle, comme ils manquèt à sainct Christophle, où il y en auoit autrefois quantité. Il y a des poules en nombre, la pluspart ne leur donnent rien, & les laissent aller dans les bois, aussi en retirent ils peu de profit pour les œufs ; mais en recompense ces poules y ayant couué vous amenēt quelquefois, lors que vous y pensez le moins, de

belles bandes de poulets.

Les viures que le pays fournit de luy-mesme sont ceux cy, griues, perdrix, ou plustost tourterelles de plusieurs sortes, ramiers, perroquets, qui à la saison sont fort gras, & ne cedent en bonté à nos poules; ils apprennent à parler avec vn peu de peine, mais prononcent assez franchement ce qu'ils ont vne fois appris. On y voit les oiseaux que nous appelons crabiers, d'autant qu'ils se nourrissent de crabes: Il n'y manque pas d'autres sortes d'oiseaux, mais plus rares, & dont on ne mange pas d'ordinaire.

Les aras sont deux ou trois fois gros cōme les autres perroquets, ont vn plumage bien different en couleur: ceux que j'ay veu auoient les plumes bleuës & orangées. Ils

apprennent aussi à parler, & ont bon organe. Ceux qu'on nomme flamens sont rouges & blancs, ont les jambes & le col fort longs, le corps fort petit. Nous en voyons assez souuēt qu'on appelle grâds-gosiers, à cause de la grandeur & capacité extraordinaire de leurs gosiers, qui tiennent quelquefois bien pres d'un seau d'eau. On trouue des fregades dont on tire de l'huile, ou espee de graisse souueraine pour le refroidissement de nerfs, comme l'est aussi, à ce qu'on dit, l'huyle qu'on tire des soldats: ce sont comme de petites écreuisses avec vn mordant seulement, qui chassent de leurs coquilles quelques petits limaçons de mer, & s'en emparent, pour y demeurer iusqu'à ce que deuenus plus grands & gros, ils les quit-

gent, & en vont chercher d'autres plus grandes. Puis que nous auons parlé des oyseaux, ie veux remarquer icy, que nous n'en auons ouï aucun qui merite d'être prisé pour son chant, & qu'il y a aussi en ce pays comme en Canada, certains petits oyseaux d'un tres-beau plumage, qui vivent de fleurs aussi bien que les abeilles : nous les appellons colibry, c'est le mot des Sauvages, qui signifie oyseau, que nous auons affecté particulièrement à celui-cy; on en apporte de mors en France.

Les tortuës de mer font vne vne bonne partie des viures du pais: il y en a quantité d'une grandeur prodigieuse, de quatre pieds & plus : on les prend dans la mer à la vare, qui est vne espeece de ba-

ston ferré, ou bien on les attend la nuit sur les anes de sable, où les femelles viennent pondre depuis le mois d'auril iusques à la fin d'aoust; telle femelle a plus de trois cens œufs. La façon de les prendre la nuit sur ces anes de sable, est de les renuerfer sur le dos lors qu'elle sont à terre, où on les laisse iusques au matin, d'autant qu'elles ne se peuuent retourner, ny s'enfuir: il ne faut pas les prédre par deuant, pource que la morsure en est dangereuse; on les prend donc par le costé, & telle y a qu'il faut deux hommes pour la renuerfer: On en mange de fraîche qui est fort bonne; on en sale vne partie ou en verd, ou en tassa-ge, afin d'en auoir durant les mois qu'elle ne terrist point, c'est à dire, ne vient à terre: cette chair salée

à quelque goust de bœuf, & est vn peu trop seiche.

La tortuë est fort defiante, & void fort clair; mais elle est sourde; de sorte que les valets qui passent la nuit sur les anses, cachez dans le bois, y peuuent causer, chanter, & se réjouir pour chasser le sommeil. Il y a vne espeece de tortuë qu'on appelle caret, dont l'escaille est de prix: on met le plastron ou escaille de dessus sur le feu, ou au prés, pour le diuiser en plusieurs parties, qu'on appelle feilles, qui à cause de leur transparence, & varieté de couleurs, sont recherchées en France, pour en faire des peignes, coffrets, cabinets, & autres ouurages.

Le lamentin, que quelques-uns appellent la vache de mer, est assez commun proche des isles; si

on auoit des barques, & des pêcheurs on en auroit quantité: la chair a le gouſt de celle de bœuf; on en tire de l'huyle pour brûler; il a dans la teſte quelques pierres qui ſont recherchées pour la grauelle; on dit auſſi que les petites coſtes ſont bonnes pour ce mal, ou pour la colique; on met ces pierres & coſtes en poudre, & on en prend le poids d'un eſcu dans du vin blanc; & le meſme fait-on des pierres de crabes pour le meſme mal, comme nous dirons.

Nous auons des lezards longs d'une aulne; les maſles ſont gris, les femelles verdes; le manger en eſt bon. On les chaſſe par les bois avec des chiens, & lors qu'ils ſe ſauuent dans les arbres, où ils montent fort legerement, les François les tirent; mais les Sau-

uages montent dans l'arbre par les liennés, & le prennent par le gros de la queue, où il ne se peut plier pour les mordre; que s'il est sur quelque bout de branche, où ils ne puissent porter la main, ils luy mettent au col vn lacet avec vne ligne ou petite perche, & ainsi le tirent à eux: il endure tout cela plustost que de se ietter en bas, s'il y void des chiens; que s'il n'y en a point, il saute gaillardement des plus haults arbres en terre sans s'offencer; & quand on le tient on luy lie le bec, & les pieds, & en cette façon on le garde les quinze iours entiers & plus en vie si on veut. La femelle a bien vinge ou trente œufs, gros presque comme des œufs de pigeon, & liez ensemble; ils n'ont point de blanc, & sans hyperbole, valent mieux

au potage, & fricassez que nos œcufs de poules. Quelques vns mangent aussi de gros crapaux larges comme vne bonne assiette, nous en auõs assez veu, & croyons que ce ne sont que grenouilles, & non pas crapaux.

Le manger le plus commun des Sauvages, pource qu'ils sont si faineants qu'ils ne veulent pas prendre la peine de chercher autre chose, sont de grosses crabes de terre, ou cancrs blancs, qui sont en des trous de terre assez proches de la mer: de vray ils sont bons, & plusieurs François s'en contentent bien lors qu'ils en ont, & mesme quelques vns mangent d'autres crabes, qui ne sont si grosses ny si bonnes, sont celles qu'ils appellent des toutlouroux, qui sont petits cancrs rouges,

qui gastent fort les jardins proches de la mer, où ils ont leurs trous : vous en voyez la terre toute couverte sur la fin du mois d'auril, qu'ils font vn tour à la mer pour se baigner, & s'en reuiennent incontinent.

La mer est assez poissonneuse : nos poissons, excepté le lamentein, les marsouins, & la dorade, n'ont point de nom parmy nous, d'autant qu'ils sont tous differens de ceux qu'on void en France : Les Sauvages du païs, & aussi quelques esclaves noirs, sont fort manigats, c'est à dire, adroits à la pèche.

*De ce qu'on peut transporter de l'isle
de la Martinique en France,
& ailleurs.*

CHAPITRE VI.

LÉ petùn a esté iusques à
present la seule marchandi-
se qu'on a rapportée en France
de cette isle, & des autres que les
François habitent. Il est excel-
lent en nostre isle ; mais la plus
grande partie n'est pas de garde
passé six mois ; il est aussi fort le-
ger, qui est cause que les habitans
ny peuuent pas gagner, principa-
lement en ce temps que cette her-
be est à si vil prix.

Les coronniers y sont beaux &
bons : ce sont arbrisseaux assez
agrecables,

à la Martinique.

Si

agrecables, qui portent des fleurs
les vnes jaunes, & les autres rou-
ges, au milieu desquelles se for-
me comme vne petite bource, où
est le coton, qui venant à pousser
la fend en quatre pour sortir. Il
n'y a pas tant de façon à le cultiuer
que le petun, qu'il faut presque
continuellement sarcler; il faut
l'éjamber, c'est à dire oster les
feuilles plus basses, & en laisser
peu; il faut luy couper la teste en
certain temps, afin qu'il ne pousse
trop en haut; quand il est cueilly
il le faut faire seicher à l'om-
bre, puis le torquer, & mettre
en rouleau: là où le coton ne de-
sire que peu de façon; inconti-
nent l'arbre couure d'ombre la
terre voisine; & ainsi empeche
les mauuaises herbes de croistre,
de sorte qu'il y a peu à sarcler;

E

quand il est cueilly on le laisse seicher au soleil quelques iours, & en fin on en tire la graine par le moyen de quelques petits moulins dont on fait tourner les rouës de bois avec le pied, comme font les émouleurs de couteaux. Il est vray que le coton emblaye, comme ils parlét, c'est à dire rempli & empesche trop les vaisseaux y tenant trop de place; mais le remede est aisé, si on veut, c'est d'envoyer des femmes, & ouuriers, pour le filer, & mettre en œuure; on en feroit des toiles, futaines, & autres estoffes, qui se debiteroient bien & en France & ailleurs, & on en feroit quantité, d'autant que le coronnier porte deux ou trois fois l'année.

Mais le sucre vaudroit mieux au goust de plusieurs que tout

cela. Les cannes sauvages, & qui sont creuës sans culture ny artifice, sont belles : on en a fait l'expérience qui a bien reüssi : elles viennent à leur perfection en huit mois. On dit communemēt qu'elles ne peuvēt croistre qu'aux lieux humides ; & neantmoins il s'en trouue icy de belles sur le hault de quelques mornes ou montagnes : possible que le voisinage des nuées rend ces lieux assez humides. Ceux qui succent la moëlle de ces cannes verdes disent que le suc qu'ils en tirent lâche doucement le ventre. Quand les moulins seront faits, cette isle sera plus considerable que par le passé.

Le rocou pourroit apporter aussi du profit : il y vient bien, & nos Sauvages l'employēt à se rougir tout le corps. J'ay desia dit

qu'il y a quantité de simples très bons & tres-rares, que les marchands debiteroient bien en France, comme aussi quelques bois rouges, & autres bois verds. Il y a dans la gardeloupe vne soulfriere, & vne autre beaucoup meilleure dans la dominique; on n'a encor veu qu'une partie de cette isle de la Martinique, c'est pourquoy on ne sçait au yray s'il y en a, non plus que des mines. Les Sauvages sçauent où il y a des mouches à miel, que nous pretendons decouvrir pour en tirer le profit. On croit que quelques espiceries y viendroient bien, qui seroit vn bon trafic; comme aussi de la casse: l'en ay veu de sauuage à la gardeloupe chez les R. R. P. Dominicains, qui bien que sauuage ne laisse pas de seruir; cela estant,

On iuge asseurément que la franche y fera bien si on en plante.

Les vaisseaux qui passent par icy traittent aussi pour d'autres denrées ; de la cassaue, ou pain du pays ; des pois ; du caret pour faire des peignes , des coffres & cabinets. Quand la saline sera en estat les estrangers y viendront aussi querir du sel : & qui auroit vne barque pourroit porter aux autres isles du sel, de la tortuë, du lamentein, & autres choses, sur lesquelles il gagneroit beaucoup.

Il y a encore d'autres commoditez qu'on peut retirer de cette isle & autres ; mais qui regardent le public , ou les personnes qui gouvernent , & non pas les particuliers, c'est pourquoy ie ne iuge pas à propos de les rapporter icy.

Ie ne parle point aussi de ce que

les marchands doiuent apporter en l'isle pour traiter avec les habitans; ils sont assez soigneux de s'en bien informer au prealable que d'entreprendre le voyage, & ce n'est pas à moy à les instruire: ioint que de ce que i'ay dit, ils cognoissent aisément ce dont nous auons plus de besoin. Quand à ceux qui y voudroient venir pour s'y establir; ils peuuent aussi cognoistre de ce qui a esté dit ce de quoy ils doiuent faire prouision. Qu'ils apportent beaucoup de linge, chappeaux, fouliers, quelque petite estoffe de couleur pour faire des caleçons ou hault-de-chaufses; pour les pourpoints ils y sont peu en vsage, & les manteaux encore moins. Les bas de chausses doiuent estre ordinairement de linge, pour euitier les vlceres des

jambes. Qu'ils ayent aussi du fil, de la soye, vn peu de bœuf & de lard, huyle, beurre, graisse, platine de fer pour faire de la cassauë, quelques pots de terre, bon nombre de haches & serpes pour couper le bois, & autres ferremens & vtenfiles. Mais la principale richesse d'vn maistre de case consiste au nombre de seruiteurs qu'il amene pour decouvrir & cultiuier la terre : Le marché qu'on fait avec eux est, qu'ils s'obligent à seruir pour trois ans, & moyennant cela le maistre les fait passer à ses despens, les nourrit, & leur donne par an quatre vingts ou cent liures de petun, & eux-mesmes s'entretiennent d'habits. Au bout des trois ans, s'ils veulent demeurer dans l'isle, ils demandent quelque place à monsieur le gou-

uerneur, qui l'accorde fort volontiers aux lieux qui ne sont encor occupez. Quelquefois deux ou trois hommes se font matelots les vns des autres, c'est à dire, se ioignent & associent ensemble, & tiennent vne mesme habitation, qu'ils font à frais communs.

Des incommoditez de l'isle.

CHAPITRE VII.

NVL bien sans peine, c'est vn mélange nécessaire en ce bas monde que celuy du bien & du mal. Nostre isle a des commoditez, elle a aussi des incommoditez. Je n'entends pas icy par incommoditez le manquement de quelques commoditez. Ce que

nous auons dit iusques à present
fait assez cognoistre ce qui nous
manque.

Venons donc aux incommo-
ditez positives & reelles. C'est
merueille si quelqu'un eschappe,
de ceux qui arriuent de nouveau
aux isles, qu'il n'ait quatre ou cinq
accez de fièvre, encore mesme,
qu'il se soit fait purger & saigner
à l'arriuée ; le remede est facile,
qui est de corrompre son mal en
marchant & trauaillant, & ne se
laisser abbattre.

Les personnes qui se tiennent
oisiues, qui ne font que dormir le
iour, ou qui s'abandonnent à la
tristesse, ne sont pas pour viure
longuement en cette isle : les vlc-
res aux jambes qui sont assez diffi-
ciles à guarir, les maux d'esto-
mach, & autres incommoditez

les accueillent, & dépeschét bien-
tost. Il faut icy fuir la melan-
cholie, marcher & trauailler gail-
lardement, se tenir nettement, &
se lauer souuent; pour cet effect
les seruiteurs ont l'apresdinée du
samedy libre, pour se baigner, &
lauer leurs linges & autres hardes:
S'ils ne se lauent, & tiennent pro-
prement, & trauaillent, ils deuien-
nent incontinent malingres, c'est
à dire lasches, malades, & inuti-
les.

Le mal des pians est assez com-
mun parmy les Negres, non pas
tant parmy les François. C'est vn
vilain mal, auquel on apporte les
mesmes remedes qu'à la grosse ve-
role; car quoy qu'il ne procede
pas de la mesme cause, il a neant-
moins quelque affinité avec elle,
& les mesmes effects sur les corps.

Il n'y a icy ny puces, ny pour l'ordinaire de poux, ou autre semblable vermine; mais en la place il y a dans les maisons des chiques, qui se forment dans la poussiere; elles sont si petites qu'on ne les aperçoit, quoy qu'elles soient noires: ces petits animaux attaquent particulièrement les pieds, & les parties d'iceux proches des ongles, ou les talons & la plante, entrent dans la chair, & grossissent comme de nos pois, & font de petits, & si on ne les tire il y a à craindre quelque ulcere; mais on les tire aisément avec vne espingle, & ceux qui arrousent souuent leurs cases n'en ont point, à quoy l'eau de mer est meilleure que celle de riuere, combien que celle-cy soit bonne. Le petun verd sert aussi, à ce

qu'on dit, de remede contre ces chiques.

Il n'y a point dans les bois de maringoins, si ce n'est sur le bord de la mer, où on en voit & sent quelques-vns le soir & le matin : mais il y a dans les bois des tiques, petits animaux plats, qui succent le sang iusques à ce qu'ils creuent ; mais ils ne font grand mal, & causent seulement quelque demangeaison.

Les petits animaux nommez ravers, mangent & gastent les draps, si on n'y regarde souuent, & on ne les met à l'air.

Il y a des vers qui percent les futailles, & tout ce qui est de bois, c'est pourquoy les vaisseaux de terre y sont meilleurs.

Mais ce qui a le plus descrié l'isle, & empesché deux mille per-

sonnes d'y venir, sont de grandes couleuvres, ou plustost viperes; car elles ont toutes les proprieté des nostres, qui ont vne morsure mortelle, si on n'y remédie promptement. Il est vray qu'il y en a; mais non pas en la quantité qu'on se persuade, & si on n'y est pas sans remèdes: elles n'attaquent pas les hommes qui ne les touchent point, & se retirent la plupart aux lieux plus escartez dans les bois.

Les chemins sont fort difficiles par les mornes, ou montagnes.

Les Sauvages nous apprennent qu'il y a quantité de poisons, & sçauent bien enuenimer leurs flèches. Les pommes de l'arbre qu'on appelle Mansenille, sont tres-dangereuses, iusques là, que si l'eau de la pluye qui a touché ces pom-

mes tombe sur la main nuë, ou
autre partie de l'homme, elle la
fait enfler incontinent.

La pluspart des viures du pays
sont legers, & de peu de suc; ce
qui fait qu'on est contraint de
manger assez souuent, & que le
ieusne est fort difficile, & quelque
fois dangereux.

La pluspart des remedes qu'on
apporte icy de France perdent
tout ou partie de leur vertu. Le
fer si roüille grandement, cause
pourquoy il est necessaire de re-
uisiter souuent les armes.

La crainte de surprise de la part
des Sauvages est presque conti-
nuelle, d'autant qu'ils sont sans
foy, & quelque promesse qu'ils
fassent, & bonne mine, il ne si
faut fier, non plus qu'eux ne se
fient pas trop à nous; ils sont

à la Martinique. 95

merveilleusement dissimulez, & traistres, comme nous dirons. On a aussi quelque crainte, mais non pas grande, de la flotte des ennemis estrangers, qui a coustume de passer proche, & quelque fois à la veüe de cette isle, & mesme y prendre de l'eau: neantmoins ny les Sauvages, ny les estrangers n'auront aucun advantage sur les François, tandis qu'ils seront sur leur garde comme ils sont.

*Des François qui habitent l'isle, &
des Negres esclaves.*

CHAPITRE VIII.

NOus auons pres de mille François en cette isle, &

esperons que le nombre croistra notablement à l'aduenir par le soin des Seigneurs de la Compagnie de ces isles, & le bon ordre qu'ils donneront, tant pour faciliter les passages en diminuant le prix, que pour rendre ces isles plus vtils, leur faisant porter du coton, du sucre, & autres denrées, dont la traite sera de plus grand profit que celle de perun.

Nos François sont tels pour ce qui est des mœurs, que peuuent estre des peuples presque abandonnez de tout secours spirituel, sans Messe, sans Prestre, sans Predicateur, sans Sacremens, dās vne trop grande licence, liberté, & impunité. Nous y auons trouué trois Prestres en vn quartier de l'isle; les autres nommez du prescheur, de la case du pilote, & du
fort

Fort royal, qui font bien six ou sept lieues de pays, n'en auoient point, & Dieu sçait si ces bons Ecclesiastiques ont eu beaucoup d'autorité, & fait bien du fruit là où ils estoient. Nous voulons neantmoins croire que nos François ne sont pas si vicieux, & si mauuais qu'on les fait en France; quoy que nous ne puissions nier qu'il n'y ait des heretiques, & quelques libertins & athées, esprits stupides & brutaux, dont le nombre ne peut estre si petit qu'il ne soit trop grand.

L'Eglise iusques à nostre arrivée estoit en si bon estat, qu'à celle qui tient le lieu de la paroisse, qui est proche du fort saint Pierre, il n'y a ny ornement, ny personne qui en ait soin: Il sera nécessaire si on veut assister selon

Dieu tous les habitans , dont la plus-part ont esté iusques à present destituez de tout secours spirituel , de faire trois maisons & Eglises, d'autant que nos François contiennét bien neuf ou dix lieuës d'estenduë le long du bord de la mer , en vn pays si rude à cause des mornes , qu'une Eglise ne peut s'estendre que deux ou trois lieuës au plus.

Nos François viuent assez franchement ensemble: il n'y a ny hostellerie ny cabaret ; mais quand on va de lieu à autre , on dîne où on se rencontre , personne ne refusant aux suruenans ce qu'il leur peut donner.

Parmy les François il y a des noirs , ou mores du cap-vert , & ailleurs assez bon nombre , non pas si grand toutesfois qu'on

n'en desirast dauantage , & que ceux qui en ameneroient ny trouuassent bien leur compte, d'autant qu'un esclaué noir est bien plus vtile qu'un seruiteur françois, qui n'est que pour trois ans, a besoin d'habits, demande des gages, n'est pas si accoustumé aux chaleurs; là où les noirs sont pour toute leur vie, n'ont besoin que de quelque linge pour couvrir leur honte, n'ont rien que leur vie, encor bien miserablement, se contentant de cassaué & de pois, & sont faits à l'air & au chaud, quoy que s'ils n'y prennent garde ils sont sujets à la vilaine maladie des pians.

Ces mores ont l'esprit si grossier & hebeté pour la pluspart, qu'aucun ne sçait ny lire ny escrire, & croit-on qu'il est presque impos-

sible de leur apprendre. Ils sont neantmoins rieurs & moqueurs, & remarquent assez bien ce qu'on fait qui leur semble impertinent. Il y en a quelques-vns de baptisez, mais dans vne insupportable ignorance des mysteres de nostre foy : c'est pourquoy il y en a peu qui ayent esté admis à la sainte communion. Leurs mariages se sont aussi faits sans les ceremonies requises ; Il y aura de la peine à racommoder tout cela, mais peu à peu on en viendra à bout, & on les instruira.. Ils entendent desia pour la pluspart aucunement le François, & en disent quelques mots sans les articles, & autres particules que nous y ad-ioustrons,

Il sont bons pour le travail, pourueu qu'on les veille & presse;

car autrement ils sont faineants grandement, & passeront le temps à dormir ou causer. Quand ils manquent il ne faut les flatter, ny leur espargner le chastiment ; s'ils l'ont merit  , ils ne s'en fachent point ; mais si vous les frappez sans cause, ils s'affligent tellement que bien souuent ils en meurent au bout de quelque temps. Iamais l'un ne rapportera la faute d'un autre, quoy qu'ils fussent auparavant ennemis.

Ils ont ordinairement du feu iour & nuict en leurs cases lors qu'ils y sont, & ne scauroient vivre autrement, quoy qu'ils aillent    l'air presque tous nuds. Ils aiment fort l'eau de vie, qu'ils appellent du brusse-ventre.

Cette miserable nation semble n'estre au monde que pour la ser-

uitude & esclauage , & dans leur pays mesme ils sont la plus-part esclaués du Roy ou d'autres; on les vend aux europeans à assez bon marché. Ce leur est vn bonheur d'estre avec les François, qui les traittent assez doucement , & parmy lesquels ils apprendront ce qui est de leur salut , & perseuereront en la foy tandis qu'ils y seront : car autrement s'ils retournoient en leur pays , ou alloient avec les Sauuages ; ils sont si inconstans, & si indifferens en ce qui est de la religion, & si brutaux, qu'ils retourneroient tout incontinent à la façon de viure de leurs compatriotes , ou des barbares parmy lesquels ils seroient , sans aucun soucy ny de salut ny de religion. On en a veu quelques-vns neantmoins bien deuots & affe-

Etionnez aux choses de leur salut: vn entr'autres qui mourut il y a quelque temps chez monsieur le gouverneur, qui prioit souuent, & ne demandoit rien tant que d'estre instruit, & que l'on parlât de Dieu & des choses spirituelles.

Il y en a de fort simples parmi eux, tescmoin vn excellent pecheur, qui au commencement a bien seruy aux François pour les nourrir: il ne veut pas prendre vne tortuë quand elle est à terre, d'autant, dit-il, que c'est vne meschanceré de les prédre quand elles nous viennent visiter. Quand son canot ou scute a serui quelque temps, ou est bien chargé, il l'encourage par des discours qu'il luy fait, & luy promet du repos pour quelques iours, & ne manque pas

quand il est de retour de luy en donner. Ils nagent si bien, & eux & les Sauvages, qu'ils ne se soucient point que leur canot verse, d'autant que quand ils sont en l'eau, ils retournent le chercher, le renuersent & rentrent dedans.

Il y a encore parmy les François quelques Sauvages de la terre ferme, mais peu; ceux-cy sont merueilleusement manigats, ou adroits à la pesche, & à la chasse du lezard; au reste fort libertins, faineants, stupides, & gens à qui il ne faut rien dire, & qu'il faut laisser faire tout à leur volonté.

*Des Sauvages du pays nommez
Caraiïbes.*

CHAPITRE IX.

ON ne sçauroit dire au vray leur nombre, pource qu'ils sont en de continuelles visites actiues & passiuës avec ceux de la dominique & autres isles, de sorte qu'il y en a tantost plus, tantost moins: Il est bié vray que la crainte & deffiance des François a fait que plusieurs se sont retirez de cette isle, quoy que nous n'ayons guerre avec eux comme ont nos François de la gardeloupe.

De religion on n'en recognoist aucune parmy eux. Ils ont quelque cognoissance de l'immorta-

lité de l'ame, d'autant qu'ils donnent aux ames des defuncts, comme les Canadois, des hardes, des viures durant quelques iours, & des meubles pour les servir: mais de sçauoir ce que ces ames deuiennent, ie croy qu'ils ne s'en mettent pas en peine; du moins nous n'auons encore peu rien tirer d'eux; possible que le temps en découurira dauantage, lors que nous serons avec eux, ou eux avec nous. Maintenant ils sont tellement separez par des mornes inaccessibles, que nous les voyons rarement, & seulement lors qu'ils viennent par mer pour traiter avec les François. Ils cognoissent par experience, à leurs despens, qu'il y a des esprits, puis que le diable, qu'ils appellent le maboïa, les bat quelques fois iusques au mou-

rir. Il n'a pas tant de puissance sur eux, lors qu'ils sont avec les François; mais au retour il les tourmente cruellement en punition de ce qu'ils y ont esté. Ils aduouent aussi que le signe de la sainte Croix fait fuyr ce maboïa; la plupart ont dans leurs habitations vne porte par laquelle ils disent qu'il entre & sort. Ils ne luy rendent aucun honneur, que ie sçache, & ne luy font aucun sacrifice. Ils cognoissent aussi vn qu'ils nommēt chemin, qui ne les traite pas mieux que maboïa. Il faut que quelques-vns d'eux ayēt communication particuliere avec luy, puis qu'ils predisent les choses futures, qu'ils ne peuuent sçauoir que de luy; comme le iour deuant que nous arriuasſions, vne vieille Sauuagesse dit à vn Fran-

çois, magnane nauire de France, c'est à dire, demain arriuera icy vn nauire de la France, ce qui fut vray.

Ils disent qu'il y a dans la dominique vn serpent, qui se fait tantost grand, tantost petit, qui a au milieu du front vne escarboucle, ou pierre fort luisante, laquelle il tire lors qu'il veut boire, & puis la remet: que personne ne le peut, ou ose aller voir en sa caverne, s'il n'a au prealable ieuné trois iours, & s'est abstenu de sa femme, autrement il ne le verroit pas, ou seroit en danger d'estre matté par luy, c'est à dire, tué.

Ces Sauvages vont entiere-
ment nuds sans honte, les fem-
mes aussi bien que les hommes:
i'en repris vn capitaine, qui ne me

fit autre responce que , non cà bon pour France, bon pour Carraïbe. Ils se rougissent le corps, qui autrement est de couleur oliuâtre, avec du rocou. Les femmes ont quelquesfois vne façon de brodequins, depuis le genoüil iusques à la cheuille du pied, qu'ils estiment gentille. Hommes & femmes portent, quand ils en ont quelque collier de rassade, ou de cristal, ou de petits os assez bien agencéz. Quand celuy, que nous appellons le pilote, qui est parmy eux l'un des premiers capitaines, & ancien amy, & fidelle aux François, vint voir monsieur le gouuerneur, il auoit sur la teste vn chappeau, pour marque qu'il ayme & estime les François; les autres vont la teste nuë comme le reste du corps. Ils lient leurs che-

ueux qui ne sont pas trop grands derriere la teste, & y passent des plumes d'aras, de flamens, & autres oyseaux, ou les laissent pendre par derriere, & y attachent quelques gentilleses à leur mode. Ils s'arrachent la barbe. Arlet frere du pilote, aussi capitaine, auoit de petites pieces d'airain penduës aux levres, au menton, & au nez. Les femmes sont mal heureuses, & traittées comme des esclaves; car il faut qu'elles fassent jardins, mesnages, & tout, excepté la guerre, la pesche, & la chasse, ou s'il ya quelque gros arbre à abbatre, le mary en prend quelques fois la peine. Ils ont plusieurs femmes; les prennent & les quittent à discretion; les traittent fort mal, & quelques fois les tuent, n'y ayant parmy eux aucune iustice nō plus

que superiorité ; chacun fait ce qu'il veut , & est quitte des crimes les plus horribles, pour dire, qu'il estoit mouche bourache, c'est à dire, bien yure. Ils tuent aussi quelques fois les vieilles gens, disant qu'aussi bien ils n'en peuvent plus , & sont mal-heureux : & quand leurs femmes sont vieilles, ils les tuent, alleguant pour raison qu'elles ne peuvent plus faire le jardin, la cassaue, ny le houikou. Ils sont ialoux , & si vne femme à manqué, ils la tuent, ou la font seruante & esclaué des autres : quand ils doutent si elle a mal fait, ils l'a font enyurer (car leur hoüicou enyure quand il est bien fait) afin qu'en cet estat elle ne cele rien.

Les hommes sont merueilleusement faineants, & passent le temps

dedans leurs lits, ou dessus à boire, causer, & se faire peigner par leurs femmes ; il ne se passe point vne heure qu'ils ne se fassent peigner, & ne prennent pas mesme la peine de pescher, ou chasser, ayment mieux se passer à peu, & ne manger que de la cassaue, & des crabes, que de sortir de la case pour prendre du lezard, de la tortuë, ou autre chose : lors toutefois qu'ils viennent traiter avec les François ils prennent de la tortuë, & l'apportent ; c'est ce dont ils traittent principalement. Ils apportent quelque fois des ananas, & des bananes, & de leurs arcs & fleches, qu'ils donnent à leurs compères ; ainsi appellent-ils tous leurs amis.

Ces Sauvages ont vne ridicule
ceremonie à la naissance de leurs
enfans

enfants; la femme se leue incontinent apres auoir accouché, & va au trauail si elle peut; le mary se met au liect, qu'on esleue au hault de la case, & là plaint le ventre, & le frotte comme s'il enduroit beaucoup. Cela dure vne lune toute entiere, qu'il ne sort du liect qu'en necessité, s'appuyant sur vn baston, & on le visite comme vn malade: il est vray qu'ils font aucunement passer cette feinte maladie en verité, tant ils le traittent mal, le faisant ieusner quelques iours fort estroittement, ne luy donnant à manger que de la cassane, & encor fort peu; pour la boisson on luy en donne assez, particulierement lors que l'enfant tette; apres quelques iours il peut manger des crabes; & puis on luy permet quelque temps apres la

tortuë, & en fin toutes sortes de viures indifferemment, comme estant pleinement guery; mais auparavant on fait vne assemblée où ce pretendu malade est dechiqueté par tout le corps, & perd bien du sang: Ceux toutesfois qui ont desia eu cinq ou six enfans ne sont plus dechiquetez que par les bras & les jambes. Pour les enfans, ils ne sçauent que c'est que de les emmailloter, ny de les delicateser comme nous faisons, quoy qu'ils les aiment tendrement.

On garde presque la mesme ceremonie pour faire vn capitaine, qui toutefois n'a pas beaucoup d'autorité parmy eux; on le fait ieusner, on le déchiquette, puis on luy iette à la teste des peaux de poisson seiches, de sorte que s'il ne se pare dextrement, il est en

à la Martinique. iij

danger d'estre blessé, & n'estre tenu pour vn bon capitaine.

Durant la grossesse de la femme, le mary ne mange point de tortuë, d'autant, disent-ils, que s'il en mangeoit l'enfant seroit sourd comme la tortuë; semblablement il ne mange point de lamentin, d'autant qu'il a les yeux fort petits, & si le pere en mangeoit, cette imperfection & défaut passeroit à l'enfant; mais quand ils mangent avec les François, ils ne sont pas si scrupuleux.

La vie qu'ils menent leur est si agreable, qu'ils en sont tres contents; & quelque bon traitement que vous leur fassiez, vous ne les retiendrez point pour demeurer avec vous. On en a veu qui ayant long temps demeuré parmy les

François, & bien à leur aise, à la premiere occasion se sont échappés, & retournent vers les autres Sauvages. Ils sont extremement deffians; ne croyez pas que s'ils voyent vn fusil en vostre main, ils viennent en vostre case, les moindres choses leur donnent de la deffiance. Comme nous passions à nostre retour par la dominique vn Sauvage vint vers nous iusques à my chemin, mais si tost qu'il apperceut nostre petit batteau qui estoit derriere le vaisseau, il s'en retourna bien viste. Si quelqu'un a des armes dans le vaisseau, iamaïs ils ne viendront à bord; si l'un d'eux monte au vaisseau, l'autre demeure tousiours dans le canot, & regarde par tout. Ils iugent des autres comme on doit iuger d'eux, qu'il ne s'y faut

iamais fier; s'ils viennent en vne case, ils regardent par tout, partie pour voir s'il n'y a rien qui leur fasse peur, partie pour descouvrir les moyès de la surprédre. Quand ils virent la maison de brique que monsieur le gouverneur a fait faire, ils venoient heurter contre, — pour experimenter s'ils la pourroient enfoncer, & la trouvant ferme, dissimulant leur estonnement & fâcherie, luy disoient comme par conioüissance, mouche manigat mon compere. Ils ne tâchent qu'à surprendre, & quelque bonne mine qu'ils vous ayent fait, où ils auroient l'avantage, il ne faudroit attendre d'eux aucune misericorde: Et quand ils ont tâché à vous surprendre, s'ils manquent leur coup, ils s'en viendront froidement vous dire, moy

non fâché à toy , & traiteront avec vous comme si rien ne s'étoit passé, & comme s'ils estoient vos meilleurs amis.

Ils sont extrêmement sales en leur manger; qui leur auroit veu faire leur hoüicou en auroit horreur. Vn iour en la presence de monsieur nostre gouverneur à vn dîner, l'un d'eux estant loin d'un plat où estoit son appetit, monta sur son banc, puis mit vn pied sur la table entre les plats, aduance yne main vers le bout de la table où estoit ce mets, pour s'appuyer, & ainsi estendu de son long sur les plats & les viandes, porte son autre main à ce qu'il desiroit. Voila comme ces messieurs sont ciuils. Au reste avec cela ils sont si superbes que qui que ce soit qui les aille voir, ils ne se leueront pas pour

l'accueillir, mais luy diront seulement, montrant vn liët, mets toy là. Ils demandent fort librement tout ce qui leur plaist, & ne faut pas les refuser; c'est pourquoy ceux qui sont bien instruits n'exposent rien en leurs cases, quand les Sauvages y doiuent venir, que ce qu'ils veulent bien leur donner. Ils promettent assez, mais ils manquent souuent de fidelité. Ils mangent les animaux qui leur font du mal, comme chiques, tiques, & semblable vermine.

*Continuation du sujet des mœurs
des Caraïbes.*

CHAPITRE X.

LEs Sauvages font souvent pour diuerfes occasions des vins dans leurs carbets, c'est à dire des assemblées dans de grandes cases faites expres, où ils boient excessiuement, sans manger que fort peu ; cela dure quelquefois iusques à huit ou dix iours, & c'est alors qu'il fait bon les attaquer, car ils sont presque tous-jours yures. Apres cette ceremonie ils commencent à traiter des affaires, particulièrement de la guerre, où les plus anciens capitaines haranguent, & sont enten-

du avec vn merueilleux silence,
& ce qu'ils concluent est fuiuy du
consentement commun ; quoy
qu'ils n'ayent aucune autorité
de commander. Ces traittez d'af-
faires de guerre commencent or-
dinairement par de grands cara-
memo, ou discours, & plaintes
des vieilles, qui rapportent tout
ce que ceux à qui on parle de faire
la guerre leur ont fait de mal, ou
à leurs ancestres, iusques à quel-
ques iniures de parole ; car que-
reller vn Sauuage, est autant que
de le frapper, & le frapper, autant
que de le tuer ; & offensez vn
Sauuage en particulier, vous of-
fensez toute la nation ; mais il
n'en va pas ainsi du bien que
vous leur faites en particulier, le
commun n'y prend point de part.
Après ces caramemo les enfans

danfants, fautans, & pleurans, demandent qu'on venge ces iniures, toute la ieunesse s'émeut, & témoigne son defir & courage, puis les vieillards ordonnent.

Outre la guerre qu'ils ont contre nos François de la gardeloupe, les Anglois de Sainta Loufie, Antigoa, Monferrat, & autres ifles, occupées sur les Caraïbes; ils la font encore aux Calibis, qui font Sauuages de la terre ferme, & ont alliance & focieté d'armes avec les Aroüagues, qui font auffi en terre ferme. Ils ne font point de difficulté pour aller fuprendre ces ennemis, de s'exposer dans leurs canots & pirogues à vn voyage de mer de bien deux cens lieues; ils vont d'ifle en ifle, & preuoient affez certainement les mauuais temps & tempeftes, par

l'inspection du ciel, & des astres, dont ils ont des cognoissances merueilleuses.

Leurs armes sont des arcs de bois rouge, avec des flèches de certains roseaux, qui au lieu de fer ont au bout vn bois fort pointu, & empoisonné: ils portent le feu dans les cases couuertes de feuilles, attachant au bout de leurs flèches du coton allumé. Ils ne visent pas tousiours droit à leurs ennemis; mais tirent en haur, & sont si adroits en cela, que la pluspart de leurs coups ont leur effect. Ils tirent aussi derriere eux en fuyant, & quand ils sont poursuivis chaudement sur la mer, ils se couchent de leur long dans les canots, pour n'estre exposez aux coups, & tirent sans cesse, bandant quelques fois l'arc de leurs

pieds. Ils ont aussi des sagayes de bois rouge, dur, & pesant; qu'ils lancent fort bien; & pour battre de plus près, ils ont des boutous, qui sont gros bois rouges, plats, espais d'un bon poulce, larges par le bout de près de demy pied, longs de deux ou trois pieds, dont ils esclafent la teste de leurs ennemis, comme nous ferions avec vn leuier.

Toutes leurs guerres se font par surprise le matin au point du iour, avec des huées horribles, & pour paroistre plus affreux, ils se peignent du noir des pommes de iunipa le tour des yeux. Ils sont en vn continuel mouuement pour éviter les effects des armes à feu, & pource qu'ils voyent la méche allumée de nos mousquets, ils évitent aisément le coup se iettant

par terre, courant tantost d'un costé, tantost de l'autre, se remüant d'une vitesse admirable, de sorte qu'il est fort difficile de les choisir; mais ils craignent fort les fusils, pource qu'ils n'y voyent point mettre la méche, & disent que c'est le maboïa, c'est à dire le diable, qui y met le feu. Ils font d'ordinaire trois bandes, & une espee d'avant-garde, arriere-garde, & bataille; mais au choc ils se mettent incontinent en desordre & confusion. Vous en avez assez bon marché, si dès le commencement vous monstrez que vous ne les craignez point, & en abbattez heureusemēt quelqu'un, ou deux, ou trois; car lors ils se retirent promptement, non toutefois sans faire tous les efforts possibles pour retirer les corps

morts de leurs compagnons, car ils craignent fort, & tiennent à grande honte de les laisser parmy leurs ennemis: mais si vous fuyez, ou vous retirez pour les battre en retraite, ou tefmoignez quelque crainte, ou tirez plusieurs coups en vain; alors ils sont extrêmement courageux, & donnent furieusement, & ne se retirent jamais, si ce n'est en vne grande extrémité. Il y en a desia quelques-uns parmy eux qui ont des armes à feu, & en sçauent tirer, ce qui est vn tres grand mal; Dieu pardonne à ceux qui leur en ont donné.

Leurs armes deffensives, comme i'ay dit, sont la fuitte, la legereté, & mouuement perpetuel, & le coucher dans leurs canots pour estre à couuert des coups;

car du reste, ils n'ont ny bouclier, ny autre chose pour se parer, & sont nuds à la guerre comme en toutes autres occasions. Outre ces canots, faits d'une piece de bois, & non pas de l'escorce d'arbre comme ceux des canadois, ils ont des pirogues, faits de deux ou trois pieces; ils sont plus grands que les canots, & y en a qui portent quarante & cinquante hommes; ils y mettent des voiles à nostre imitation, quand ils en peuvent avoir. Ils tuent & mangent leurs captifs avec mille ceremonies, & cruautéz, non pas toutesfois si grandes que celles des canadois. Ils gardent quelquefois vne main d'un ennemy mort, qu'ils portent en triomphe, & dansent au tour. Jamais ils n'oublient ny ne pardonnent le mal qu'on leur a fait,

ou qu'ils preteñdent qu'on leur a fait. Ils nagent comme poissons; en guerre ne se soucient pas, comme j'ay dit, que leur canot renuerse, car ils sçauent bien le redresser, & se remettre dedans. Ils y portent tousiours leurs liëts avec eux.

Ces barbares ne content point plus haut nombre que dix, & s'expliquent monstrant par leurs doigts; quelquesfois ils vont iusques à vingt, ou deux fois dix, monstrant les doigts des mains & des pieds; apres cela, s'ils veulent en dire dauantage, & exprimer plus grand nombre, ils prennent du sable, & le jettant disent, mouche comme este, beaucoup, ou grand nombre, ou autant que cela. Ils content leurs mois par lunes, & les iours par nuits, & disent

disent, ie seray là tant de nuits,
ou ie reuiendray apres tant de
nuits. Ils expriment aussi l'estat
qu'ils font, & l'estime qu'ils ont
de la bonté des nations par leurs
mains & bras, & montrant la
main entiere, & vne partie du
bras, vous disent, France bonne
comme este: pour les Flamens, ou
Hollandois, ils monstrét la main,
& disent, bonne comme este: les
Anglois font les pires dans leur
estime, ils ne montrent pour
eux que le bout des doigts: Pos-
sible que quand ils parlent des
François en leur absence, ou de-
uant ces autres nations, ils ne gar-
dent pas cette diuision. Ils vsent
peu de tabac, & ont bien occa-
sion de se mocquer des europeans,
qui vont chercher si loing dans
leprs isles cette méchante herbe.

Ils ont vn langage particulier que ie croy qui est fort difficile à apprendre; mais en outre, ils ont vn certain baragouin meslé de François, Espagnol, Anglois, & Flament, le trafic & hantise qu'ils ont eu avec ces nations leur ayant fait apprendre quelques mots de leurs langages; de sorte qu'en peu de temps on peut & les entendre, & se faire entendre à eux, qui nous fera vn grand aduantage pour les instruire.

Du fruit spirituel qu'on peut espérer de cette isle.

CHAPITRE XI.

IL est aisé d'inferer de ce qui a esté dit iusques à present, que

si les marchands peuuent retirer des commoditez temporelles de cette isle, & autres; il y a aussi vne assez belle esperance d'une triple moisson pour ceux qui font le negoce des ames. Si les moyens de subsistence, qui consistent en vn secours necessaire de la France, ne leur manque point; on peut se promettre, que celuy qui leur a donné les talens, & commandé de les employer à ce trafic, *negotiamini dum venio*, en aura de la satisfaction, & les bonnes ames, qui ne cherchent que sa gloire, du contentement & consolation.

Quand il n'y auroit qu'environ mille François, nos compatriotes, qui sans la culture necessaire deuiendroient barbares, & sauvages dans ces bois & retraites

res de la barbarie & sauuagine; ce
seroit vn employ fort vtile, &
d'autant plus necessaire, que la
pattie nous lie & oblige plus
estroittement à ceux qu'elle a
nourry & eleué avec nous. Ils nous
sont particulièrement alliez; &
Saint Paul nous aduertit, que
nous sommes tenus d'en auoir vn
soin plus particulier; duquel si
nous nous dispençons, nous ne
meriterons plus honorable nom
que celuy d'infidelles, ou quel-
que autre encore pis, s'il y en a.
Si nous deuons auoir de la com-
passion pour les Sauuages d'au-
tant qu'ils sont abandonnez; par
la mesme raison, ou plustost à
plus forte raison, nous en deuons
auoir pour les François, lors qu'ils
sont au mesme estat d'abandon-
nement. Si ie ne me trompe, il

n'est pas moins necessaire, & agreable à Dieu, d'empescher que les anciens Chrestiens ne deviennent Sauvages, que d'attirer les Sauvages à se faire Chrestiens. Ce nombre va iournellement croissant, & avec luy les necessitez spirituelles, & croistra encore plus lors qu'on sçaura que les moyens n'y manquent pas d'y faire aussi bien son salut qu'en France. Ceux qui se tiennent près de leur conscience n'y voudroient pas aller autrement, & sans cela on ne feroit de cette isle qu'une poneropole, ou retraite de desesperez.

Il y a une seconde moisson; c'est des barbares negres du cap de vert, & autres lieux, dont il y a bon nombre, qui augmentera si on croit nos François, à qui ils

sont fort vtils. Quelques-vns de ces mores sont desia regenerez, & blanchis dans les eaux du saint Baptisme; les autres pour la pluspart desirent le mesme, & ie ne doute pas que depuis mon depart quelques-vns, qui se presentoient pour estre instruits, n'ayent receu cette faueur de ceux que i'y ay laissez. La difficulté des nouueaux establissemens, la stupidité de la pluspart de ces esprits, l'inconstance qui leur est naturelle, & qui feroit que, s'ils retournoient en leur pais, ils retourneroient aussi à leur infidelité, ayans ordinairement fort peu de sentiment, & trop d'indifference en matiere de religion; nous ont obligé à proceder vn peu lentement en cette affaire, où il faut bien prendre garde de rien precipiter, &

n'accorder si tost à quelques-uns ce qu'ils nous tesmoignent desirer.

Quand aux naturels du pais, nos sauvages Caraïbes ; on voit par ce qui a esté rapporté aux chapitres precedens de leurs meurs & façons de faire, la difficulté qu'il y aura à les convertir. Ils vivent à leur aise dans vne tres-grande oyfieté, dans vne entiere liberté de tout dire, & tout faire, dans l'impunité de leurs crimes, mesme les plus horribles, sans honte de leurs débordemens, nudité, polygamie, yurongnerie, & vilenies, sans besoin de l'assistance des François, qui les contraignent de nous rechercher, & viure parmy nous, ou desirer que nous allions habiter avec eux. Ils disent que c'est nous qui auons be-

soin d'eux , puis que nous venons
en leurs terres , qu'ils se sont bien
passez de nous , & s'en passeront
bien encore. Ils sont deffians ,
cruels , inconstans , trompeurs ,
sans foy , sans loy , sans appre-
hension de la iustice diuine. On
ne peut , quoy qu'ils promettent ,
viure en assurance parmy eux ,
d'autant que le premier à qui la
fantaisie prendra durant leurs
vins , vous ira égorger , & il n'en
fera autre chose , quoy que vous
ne l'ayez iamais offensé. Neant-
moins ce qui n'est pas possible
aux hommes seuls , l'est à Dieu ,
& aux hommes assistez de sa gra-
ce & puissance ; il peut faire de
ces pierres des enfans d'Abraham.
On tâche à tirer d'eux quelques-
uns de leurs enfans pour les in-
struire , & ensemble s'en seruir
pour

pour ostages ; & il semble apres tout , que le temps soit venu , auquel Dieu auoit destiné de ietter les yeux de sa misericorde sur cette infortunée nation. Ils font desia volontiers le signe de la sainte croix , & en plusieurs occasions prononcēt à l'imitation des François les saints noms de I E S U S & de Marie , & recognoissent que par ce moyen ils font fuir le malin. Ceux qui ont plus hanté les François se monstrent aucument dociles ; & le principal & plus considerable d'entr'eux , qui est maintenant le premier capitaine , nos François l'ont nommé le pilote , a tousiours eu dès le commencement vne affection particuliere pour eux , les assistant de viures dans la necessité ; leur donnant aduis des desseins des

autres Sauvages , procurant la paix autant qu'il a peu ; de sorte que quelques-vns croient , que sans luy les François n'eussent peu se loger & maintenir dans l'isle. Il continuë encor ces bons offices , de haranguer au conseil des Sauvages pour les François , & de nous reueler le secret de leurs assemblées , iusques à se faire haïr de quelques-vns des siens à nostre occasion , & dit que si les François chassoient les Sauvages de l'isle , pour luy il ne s'en iroit point , mais viendroit vivre avec nous , si ses femmes & mariniers , ou seruiteurs & amis le permettoient. Ayant vn iour esté arresté par les François , il remonstra au capitaine , qu'il auoit tousiours esté pour eux , & iamais contre , & qu'il leur auoit

seruy dans leurs commencemens, puis il conclud ainsi, que si non-obstant cela tu me veux mattrer, non force; mais tien, voicy mes femmes & enfans, fais les baptiser. Estant venu voir monsieur le gouuerneur, il beut à nous durant le disner, nous vint visiter en nostre case, & entendant que nous voulions aller viure parmy eux, il en tésmoigna du contentement, & dit qu'il parleroit pour nous à l'assemblée. Voila quelques commencemens, si Dieu les benit ce Sauuage seruira par ses discours & bon exemple à la conuersion des autres.

Ce Caraïbe, que nous auons nommé le pilote, a vn frere nommé Arlet, aussi capitaine, grand homme, & de bonne façon, qui a pareillement autrefois eu de

bons mouuemens , & on nous assure, que si les femmes l'eussent permis, il se fust fait instruire & baptiser il y a quelque temps. Il nous visita aussi peu de iours apres son frere , nous interrogea fort, goustâ du hoüïcou de France, & permit en fin , quoy qu'avec peine , que les femmes en goustassent: Il tesmoigna autant de ioye que son frere de nostre dessein d'aller parmy eux, & nous dit semblablement , qu'il parleroit pour nous, & que les femmes nous feroient de la cassave, & du hoüïcou du manioc qu'il nous donneroit. C'est ce qui nous peut donner bonne esperance , & me fait coniurer le lecteur de cette Relation, d'adresser ses vœux au ciel pour ces pauvres Sauvages , & pour ceux

à la Martinique. 141


qui contribueront à leur conversion pour la plus grande gloire de nostre bon Dieu.


F I N.




THE UNIVERSITY OF CHICAGO
LIBRARY
1200 EAST 58TH STREET
CHICAGO, ILL. 60637

64-180
May 1964
Francis
Edwards







E640

B781r

